


玉山草堂續集  
紅蕙山房吟藁





玉山草堂續集

錢林撰

叢書集成初編

(補印本)

玉山草堂續集及其他一種

一九四〇年十二月初版  
一九五九年十月補印

商務印書館出版

上海大東集成聯合印刷廠印刷

# 玉山草堂續集第一

仁和 錢 林 東生撰

尊酒論文小草丙子

將赴粵東述懷三首

七年躬苦頓。負疚忝食祿。皇華一以賡。靡及仍三復。當厲王陽志。願刮吳蒙目。庶幾可酬知。毋曰徒懷慙。朝戒嚴城裝。暮投固節宿。首塗僕御飭。久客津郵熱。去樹循舊蹊。迴山豁新日。威夷驚絕鞞。浩蕩思催軸。疾動炎乃侵。心煎時易條。幸茲得良友。眷眷余膺服。同奉使者吳同年信中。

亟亟出門去。欲去復躊躇。借問何爲爾。日與古人疎。耳目近所接。總雜頗有餘。苦無孝先筭。兼廢兒寬鋤。業荒口可籍。職曠咎何如。賢哉子墨子。適衛能載書。

卽景

邈邈鄉始覓。蒼蒼天欲暮。烟消月出時。遠見房山樹。

經兗州口念二韻

浮雲南下卽荆徐。一片寒山倒影虛。魯殿秦碑復何在。暮天臨眺轉躊躇。

晚次新嘉驛。寄詩社同年林三兄培厚。沈大兄岐。董大兄國華。羅大兄家彥。費三兄丙章。史二兄評。王大兄道行。

撰酌都門外。遵塗汝水東。跡漂寧似梗。心擾只如蓬。宿莽披輕晦。疎棠獻小紅。相期論五際。歲晚與君同。

鄒縣拜孟子廟作

偶然爲客卿。坎坷惜生平。蠹簡七篇在。溪毛一獻成。填牆舊碑碎。甃石凍泉清。千祀檐前檜。寒山翠共撐。

見槐花戲贈吳同年

夢回亭吏催排馬。薛北滕南官路斜。還似昔年忙夏課。瀟瀟疎雨落槐花。

徐州懷古

韓生下說遭烹死。欲渡江東願已違。明日沛中兒拍手。漢家亭長繡衣歸。場平如削曉分曹。杖奮毳驚僕射勞。說與兜鍪渾不解。七軍新已募銀刀。節逢白露征衣膩。人過黃樓別酒醒。問取他年各名士。數聲風笛起漁汀。

雨後行舒城道中

空山雨忽止。悠悠發清想。時有涼風來。復聞田水響。

早發黃梅縣。經濯港。望破額山。寫懷寄羅同年。

綽騎睽修阻。露零方未已。遙望破額山。明滅微雲是。我欲拾香草。遠遺瀟湘芷。愁思寫春波。空烟碧千里。

九江城下有懷陶令

偶闕三徑資。絃歌聊可爾。束帶見郡掾。棄之如脫屣。遂懷沮溺心。不薄樊須鄙。翼翼望歸鳥。依依樹墟里。我來經柴桑。欲扣曠達旨。浩然懷古意。雲與江上水。

望東林作

一瓢小隱支公座。五字閑題謝客詩。寂寂斷橋流水外。虎溪惆悵獨尋時。

東林寺貽珉公

秋氣常在水。雷聲多傍山。老僧贈扶老。請與步林閒。一笑復相謝。此身猶未閒。

三笑堂

松鼠行有聲。缺月斜未墮。偶隨溪水去。復此磐石坐。誰許作周旋。空山我與我。

西林

營營終日將何務。解帶看山偶成趣。茅齋斜倚兩三松。花港分流六七步。西林道場誰所開。我將會客招宗雷。惠好儻蒙三益至。許分閑澹置茶杯。

晚度虎溪橋

谷靜水潺潺。翠微方掩關。露生竹林早。月與溪僧還。有愧周從事。重來問北山。

瑞州試院東軒蘇文定監稅筠州時居此題壁一首乞吳同年和之

筠州監稅非我意。東軒長老情庶幾。烏皮偶借碧梧隱。鶴骨不如支子肥。有情桑下得常住。無事漢陰容息機。權櫬觸熱者誰子。走馬又逐黃埃飛。

高安雨景

遠山重疊亂溪流。作得荒寒不是秋。斜亞竹枝紅繖重。勃姑聲裏到筠州。

峽江城下雨中待渡有感

楓垂綠葉染秋烟。水調輕彈一兩弦。萬里客情容易起。有風有雨峽江邊。

凌江旅夜

入夢初疑雨。灘聲月一樓。蕭蕭沙上雁。并與作鄉愁。

凌江曲

酒含微綠浸春夜。人醉欲眠花滿窗。款乃一聲催夢去。暗隨烟月下凌江。

修仁

不善身不入。吾師仲氏子。未敢敵貪泉。且飲修仁水。

平圃有張文獻故宅。以詩弔之。

唐朝黃閣老。遺宅碧山隅。此日枿櫺盡。當年風度殊。無心猜海燕。有識辨胡雛。更歎陽春曲。千秋調易孤。

晚泊乳源江口

舟與暝色去。不知江路寬。傍蓮秋鷺靜。入竹夜漁寒。擁絮聊忘睡。敲茶欲代餐。窗前有官燭。借作望舒看。

峽山寺貽曠元上人

丙寅歲。從陳學士入粵。到峽山寺。作五言一首。寫付曠元上人。不復記矣。今年奉使過此寺。上人

出以相示。紙墨粲然。爲恍然久之。因更作一首貽上人。嘉慶二十一年丙子七月二十四日。

巖舟巖磴下。乘興叩禪關。泥滓十年客。雲松六祖山。蘿銜紺蕊密。榕架綠陰閑。頭白南華侶。清言幸再攀。

題峽山寺西閣

寺小通幽處。前遊屐未經。橫斜松網結。隱見藥茵靈。猿洞春祈雨。犀潭夜汲星。從來僑洗意。失利破飄瓶。

三水縣

三日留君住。江深路莫貪。蠻音徐聽曉。海味乍嘗甘。昏旦景常變。冬春候各參。遙聞采蓮唱。的未減江南。

舟中誦黃大令任西湖雜詩和之

水仙祠外雨連汀。慶忌塔前風皺萍。一唱同心魂欲斷。烟波無際是西泠。暫到杭州望汴京。樊樓槃桺不勝情。金錢賜與君王笑。宣喚湖頭宋嫂羹。金堆栲栳買春難。萬樹宮花著意看。重到玉津園外路。酒旗風影作春寒。二月水平蕁吐絲。采茶穀雨正相宜。可憐老鐵顏唐意。只解逢場唱竹枝。

詠佛山鎮風土

爲喜珍華有。兼稱耍鬧堪。酒材題若下。蔗種乞扶南。花埭春籠鶴。燈窗曉簇蠶。朝官解詢此。便作帳中談。

貝多水

氛雜雖爲累。林亭趣自賒。歌樓綠珠里。卜肆仲翔家。竹瘦蟲書字。蕉肥鹿喫花。韶春足相賞。未用惜年華。

野眺偶成

此中常有營。擾擾世閒名。忽踐邱園諾。偏增綺角情。坡晴牛送笛。崦曲鳥催耕。轉愧南村友。新居卜未成。

入謝氏園偶題



避喧攜研几。適意訪山池。自看楊家竹。非耽謝傅棋。蟬吟花氣午。人靜柳陰移。向晚行吟去。漁舟載月隨。

再遊謝氏園。有懷張秀才增。

晚從蒙密處。負杖更潛行。藜暈皆成篆。葩攢不辨名。月斜倚巖桂。風響落山櫻。時復傷孤獨。申言眷友生。

山居樂

青山常在屋裏。溪水直到門前。乘月每逢客至。看雲未礙人眠。郊居沈約初賦。隱舍周顛已成。蓼紫芹青午食。雨香烟暖春耕。園圃偶因自闕。酪鹽無待外求。何用良田廣宅。偏宜稚結蓬頭。學道每緣疾損。著書不愛人知。松子新秋滿地。豆花疎雨一籬。

水村樂

耽吟酒詠茶詠。恣往南垞北垞。雨細好籠箬笠。溪深忽見桃花。閭巷溶溶秋水。菰蘆隱隱炊烟。甌香紅稻徐熟。日午晴軒自眠。從容世務先理。幽細人情自看。奴婢探支鶴料。兒童學作魚官。下置紫菱山畔。鳴榔青草湖頭。偶然騎馬人至。笑問得魚賣不。

鎖院詠月

西南玉鉤挂。江城涼意生。未圓偏作態。欲側故含情。滿院梧竹靜。千家砧杵鳴。清輝儻足攬。我欲貢瑤京。

五先生詩

茂才長洲沈先生燾

讀易不慕榮。著詩常自勵。襄陽舊門戶。清德今誰繼。回瞻受經時。潛焉屢出涕。

武威令錢塘沈先生宸

教織種木棉。邊地民安作。怛然頓殞謝。骨返魂應住。夙聞桐鄉閒。嘗有朱邑墓。

吏部郎中錢塘張先生培

酒故美於官。嗜之以醫俗。名將輕畫餅。趣亦參金粟。何以品題之。任情稱止足。

太平守仁和葉先生藩

偶然逢俗人。閉目成結習。加冠不嫌小。垂帶何爲急。此日過檀橋。風流猶可挹。

江西新城令仁和王先生庚期

結字不敢草。呼人常以位。儒緩時易乖。何乃求爲吏。茫茫山岳內。斯人竟淪棄。

董中丞贈杏酪一器

細寫瓊糜滑。輕調石髓流。雞蘇新煮喫。中與作奴不。

張二兄衍基。蔡二兄學元。蘇二兄獻琛。三同年。招同吳同年遊北山道院。坐李尊師西齋詠松下風。

異此一心內。積茲千寸埃。故人邀我坐。清意忽悠哉。曖曖烟辭竹。蕭蕭露墜苔。祛塵篋小障。戒節練新裁。

瑤軫暫已息。道書猶未開。南軒落日靜。樵唱爲君來。

書院十五夜。與次軒家兄翫月。寄湖南謝學使階樹。

非烟亦非水。滿院自成秋。庭葉脫未已。笛聲無那愁。美人感幽獨。遙夜倚西樓。願以襟情詠。貽君杜若洲。

十六夜後與次軒家兄翫月寄重慶林太守培厚  
好爲語明月。莫窺樓上頭。畏教侵客夢。不得到渝州。

階下水蕉初展葉。偶以爲詠。

翠倚秋蘭嫩。壓莎蜻蜒翅。薄染湘波。采珠人遠無尋處。借得衣香爾許多。

與從子少軒海幢寺西禪堂晏坐。

樹陰掃還合。涼蟬時一鳴。欲乞臺郎兒。暫憩法王城。談柄有妙理。養和多善情。晚來鉢帽至。相與證無生。

次軒家兄邀遊六榕寺訪寂上人

折松以爲屨。日午言未罷。齋廚起微烟。落葉蕭蕭下。

題陳處士獨漉堂集後

獨演風騷瘴海瀕。此才端合配靈均。欲成變徵思逾澹。爲瀘頽波格轉新。零落雁蟬天寶曲。荒唐姓氏義熙民。杜鵑含血悲吟夜。濤落厓山倍愴神。

和張秀才厓山詠古

東望厓門氣寂寥。長年石朽恨難消。舟中建蹕殘疆盡。海上提軍故闕遙。萬里園陵龍島月。三更鼓角蠣灘潮。同心尙有文丞相。泣賦零丁是大招。

蔣制府尙書贈友石齋帖

戲鴻秋碧人爭覩。滋蕙繼之何足數。近傳快雪微失真。棗木此年登祕府。尙書有贈我愛藏。寶珠在椀玉盈箱。合應一片羊公石。勝得千金陸賈裝。

買得領字從山本蘭亭

右軍麻紙不得見。并失唐賢舊黃絹。一僧旁注領從山。快然自足旁有小僧字。二百餘字開生面。心疑爲影爲雙鉤。墨氣晶瑩千萬秋。安得滄江逢米老。看碑爲辨遼鄉侯。

酬張孝廉維屏

梅幸折來傷遠寄。柳堪攀處惜初分。相逢正說相思苦。紅豆花開又別君。

別廣州二首

出門意惘惘。將歸無奈何。人心似楊柳。最苦別離多。曾作珠江客。重來倍有情。含愁避江草。莫使喚愁生。

別英德劉明府

相勸須傾琥珀鍾。人生難得是相逢。酒醒忽下瀆陽去。一夜灘聲樹萬重。

江行雜詠

燂金蟹飴脆。鏤玉蝦生白。味俊君不嘗。將爲僮楚客。牢落故人盡。峽山重到時。夢中還說夢。輸與老僧知。一入曹溪路。儵然染著清。晴窗小三昧。爲試綠昌明。

欲問南華寺。秋江漾淨邊。色身知不染。此地是蘭泉。  
極目長天外。滄波不盡流。八行想情舊。何處滯銀鈎。

凌江館夜夢林三兄太守寄書說杭州事覺後成此。兌便使寄重慶。

二月西湖春可憐。詩情酒分此時偏。相招茗塢探香入。有約梧窗聽雨眠。悄悄水天尋舊事。匆匆絲竹感中年。芙蓉江路秋衾夜。寫恨難通十色牋。

夜行南雄道中

夜寒星出四五箇。千家萬家掩扉臥。溫公壘敗鷓鴣叫。回盤古冢黑蛇穿破。蒼黃未許墨黔突。拘窘有如弼升座。思得沃面解征衣。強欲作詩今懶作。

庾嶺梅樹北枝未開

庾嶺梅數樹。偏客一枝春。鞞袍定重到。風月倍償人。

過太和縣。吳同年枉以新什見示。奉答。

風土雖殊異。聊堪散鬱陶。溪苗苗連母。山鳥喚功曹。蓮墜風擎顛。松清露煮醪。盡將佳句取。貽翰佩同袍。

贈吉安胡明府

美君能治縣。西候見君初。心每諧山水。恩常慰里閭。慕陶惟種秫。效褚欲安蔬。卻損秋時俸。囊添一部書。

吉安城下聞榜人唱竹枝歌

下水舟去疾。上水舟來遲。水車兩岸吟不已。更向江亭唱竹枝。竹枝啁啾止還作。艤兒趁巧相銜著。不知

鋤地不采山。安穩風波遠行樂。一聲高一聲低。一聲逐走馬。一聲韻鷓鴣。枝上雛失羣。府中烏夜啼。如悲飲牛戚。似感烹雌奚。清商失傳李郎子。長嘯記得商陵妻。西州大賈攪衣起。罽上漁翁側耳迷。吉州城頭人搗鼓。白沙沙平數枝艣。斜指銅江驛外烟。亂捎玉峽洲邊雨。當年曾買釣魚篷。楚水吳灣有夢通。乞聽猿鳴休乞郡。轉船明日又巴東。

通遠驛夜偶成

晚來窗不掩。遠近入寒山。涼葉落旋止。流雲往復還。正防聲變楚。亦笑語成蠻。斟酌傷秋句。吟成且合刪。匡廬積雪。皎素映帶。絕可翫賞。

綠苔徑裊裊。白石溪粼粼。明月空山閒。獨步逢美人。瑤臺數千片。吹落瑤臺新。窈窕梅花時。烟霞相與春。紛吾末事擾。幾載成淄磷。一望幽虛天。萬想入無垠。曠蕩滅沒際。豁然見其真。明日升東峯。思跨黃麒麟。入野寺不逢一僧。

何處攜瓢笠。梅飄雪一村。天寒不歸去。留鶴守柴門。

贈九江朱太守同年棨

都門一相送。判已隔河關。三歲分襟後。重逢秉燭閒。塵泥話滄海。客鬢惜秋山。更指庭中樹。明朝寄遠攀。詠庾樓下晉時槐樹。呈太守朱五兄。

葦葦復芊芊。生根典午年。叢駢學枯瘡。閱歷見蒼堅。黑飽新春雨。青蒸上古烟。皮粗苔厚積。腹洞火潛然。真宰心調護。洪濤氣接連。終看神物化。未合老江邊。

朱太守置酒九江亭上對雪作

向曉新霽集。留歡舊雨陪。行廚珍屢薦。步障暖須開。勻點瓊枝失。柔鋪玉蘚猜。家家歌吹動。溢口又春回。

別朱太守同年寫詩奉寄附呈二韻

梅洲遠水翠篙通。溢港回看漸隔中。短小詩篇憑急寄。貪君寫入畫屏風。

孔壠驛夜不寐歎衰

倦時求伏枕。詎有一時曾。涼換風牀笛。秋生水閣燈。力衰詩強振。髡益鏡先憎。爲語江都相。時清百不能。

將次黃梅驛遇微雨作

村外林空數火明。渡頭舟小一囊輕。爲添冲澹詩人思。遠水平蕪故蔡城。

呂亭驛曉景

蒼蒼望宮雉。馳暉方渺然。林栖隱見月。崖遞去來烟。

曉次臨淮舊館

無限淮西路。吟詩此再經。倦增湖雨白。夢斷楚山青。查擁迷沙岸。棠枯記驛亭。前驅知我意。未肯急揚鈴。

發徐州後次柳泉口述寄王太守澤二首

杜發狂言好。樊稱直筆堪。能詩且須去。依例守江南。賤粗詩苦劣。遠答捐勤意。有愧范零陵。緘情一封淚。

界河夜成二十字問兗州宋太守疾

臥將□謝眺。諾每畫宗資。獨背殘燈坐。詢君不恙時。

歲將暮矣。行役永久。寂寥寡歡。意有所懷。以五言系之。

頗資升斗給。非闕簿書才。試吏除爲眞。翻然歸去來。世無荷蕢者。誰識有心哉。諸進士嘉樂。試吏江南。補泰興令。未一月乞罷歸。

給札陳萬言。胸中溟渤勢。毋以決塞後。而忘便宜計。輕之爲詞人。嗟爾不經濟。陳大令文述有海運議。

拖水遣聞人。塢流法王景。君長經傳者。乃復鴻驅騁。示我河渠書。豈云隻字警。陳大令鶴齋。

州縣每相謂。此官殊自粗。多言有眞意。俸入此時須。庭晚梳髮罷。蕭蕭樹幾株。蔡大令壬

馬曹自言忙。愛古遭人詆。當其勤著錄。劇若稽鹽米。袞袞詞林中。吾推有根柢。朱兵部爲弼。雅好金石文字。

未老意錯莫。茫茫人海中。跨驢怕徒步。力盡耳雙聾。輸卻華山下。蒲團打睡翁。項孝廉杜。

欵案十餘年。心勦悲形瘵。一聞吐妙辨。勿藥成瘳快。今夕感分飛。悠悠各行邁。官綯修煥。今年奉使入蜀。

養冲營自寡。習嬾道因全。我愛周司業。初寒掩關眠。從來患關鬲。同病更相憐。周司業之琦。

學畫亦已勤。作事不厭繁。偶然入蕭寺。乞聽西方言。雪止僧未歸。茗香入晴軒。朱處士鶴年。

采柏詠佳人。揮觴矚時運。幽襟或暫契。清製乃獨奮。惟恨臣朔饑。閔寂誰相問。邵上舍廣銓。

垂老意有託。見之從軍篇。計乖夢亦左。寂處私自憐。沈埋舊篋筆。羞澀空囊錢。再從兄東。

西臺望雄切。出又領儲胥。一蹶不復起。聚徒方授書。炎方景殊異。餐衛問何如。從兄斌爲粵東書院山長。

廿載專門學。百篇題畫詩。俗人強曉事。舉手擲揄之。元晏今不作。終須失左思。舍弟杜。有松壺畫齋二卷。



景州旅次彭大兄希曾枉顧。

望京冀塗近。近矣情彌迫。當北而更南。看朱乃成碧。不因良朋過。竟作憧憧客。

將次涿州作

季月晷苦短。前望又綿邈。蒼然平楚閒。積氣連河朔。駝健馬偷睨。鷹饑兔愁捉。欲問涿州城。樓頭暮吹角。

# 玉山草堂續集第二

瓊膏冰齒齋吟稿已卯正月至四月

正月七日雪柬朱八兄鶴年

雪好逢今日春遲尙舊年登登臘月鼓曖曖竹林烟衣冷紅棉膩甌香碧餠圓明將訪袁舍莫自閉關眠

耶律文正公墓

畏吾村畔路今有太師墳伏臘誰相過烏鳶自作羣鐵剗碑首墮電鑠樹梢焚湖水流無極含愁暝色分

馮明府成贈須溪茶

有病不治惟苦辱往來禮數都從刪須溪上品誰贈我故人情重金十環箬封未開破一角蹙縮妙狀先  
偷瞞亟通地鑪放火活昊天寺水流瑋濕縑囊清噴珠的的攔石香裏苔斑斑細花薄沫宜靜候毋令攪  
邊操且艱泉聲松聲沸滿院那有俗客敲門櫬先生消搖供奉班長安小住十載閒果如密甜嚼不得對  
酒有膽終成豚大官蒸羊味珍絕過食委頓頗所患下箸日日藜藿在漸覺腸肚撐茅菅春團兩寸暫相  
對無俚亦足破我顏依經烹試況如法此樂不慮天公慳斯須臆中滓悉滌如用峻法驅梗頑新歲雪霽  
人意閑肉紅光照雙花鬢枯喉一澆潰悶失再咽馨歎股忘瘡三盃五盃口微醉轉恐羽化登仙寰餅長  
如人糲澳釜茶神未祀情未懶季卿宜慰爾何物敢以博士輕嘲訕建安門鑄味亦勝南北有夢通往還  
期君肯作東道主挈具明日窮三山

教習英公試家藏明熹宗小鐵斧歌

賓州黑金三寸強。非燕匕首非干將。是誰燒炭百回鑄。意取愜當藏鋒鏗。老蛟垂涎觸手膩。烏雲半壓藍鬚潰。靶頭液液鷓鴣斑。鑿出春坊一行字。此物傳聞天啓年。幸入祕府誇封纆。宮門禁牌那足擬。宣德香鑪不直錢。木經卻陳御榻上。般輪剗刷森相向。前皇自號總兵官。今聖實兼將作匠。當頭獨坐委鬼公。助者滿地茄花紅。始憐發劓崔御史。復見厲刃朱童蒙。獄曹鑄語如鑄鐵。鎮撫司前日流血。虛傳銓府如意豪。直使楊漣大刀折。君不見大藤一獠獠。將兵兩鉞能成功。君不見逆瑾幼自宮。雙刃敢挾蒲葵中。西廠內廠誇勢力。熱可炙手將毋同。巧將一斧蒙天後。若較汪劉更何有。大寶誰陳侍史箴。太阿已入貂璫手。米脂驛卒乘騾行。潢池廿載求弄兵。有讖預徵熹廟斧。行人只說永昌城。

閑中

最祕人閒安樂方。閑中領取只尋常。蒸餲裙下餐逾美。濁酒牆頭過不妨。善病轉於求藥簡。無車那爲詣人忙。五湖三畝今營未。蝸寄年年且異鄉。

東坡夜遊山寺圖歌

晚來鄰犬吠如豹。客子畏寒披縵袍。菴空無僧磬寂寂。落葉如雨溪嘈嘈。偶思飲酒忽逢鄧。卽欲吟詩誰和陶。意闌爲謝二客道。明日吾欲歸臨臬。

奚岡水村圖

不須辛苦作詩翁。愛向溪頭理釣筒。換卻銀鰓人醉後。葦花深處蚌燈紅。

奚九繪事人共珍之。詩爲藝掩。無稱之者。然其詞調秀雅。必傳無疑。偶爲二韻。敍之。且傷其窮老不遇。並致憑弔之意云爾。

畫得天機磅礴。詩存古調。妃呼豨。賣錢置取生涯在。一樹梅花一釣磯。

騎馬出東便門

縱是犁眉健。須教行步遲。打牛煩捉塵。笑殺蔡充兒。

東竺菴晚景

晚來盥漱餘。寂靜開禪戶。空山無遺響。露滴清可數。時有一僧來。渾忘作賓主。

盤山吳氏園曉起作

聽雨猛拌春事盡。夢回曉色逗晴紗。繞簷山鵲喜相報。纔見一枝紅杏花。

夜至天香寺月下看杏花同奎學士照作

幽鳥一囀花開時。山空夢醒明月知。玉驄驕逐花香去。山翠迷人不知處。歸來懶就桃枝眠。花飛滿衣人欲仙。更憶黃州舊遊好。吹簫踏月付當年。

經易水上詠燕太子丹餞荆軻事

從來送別者。誰見白衣冠。意氣一朝盡。秋風千古寒。金臺晴歷歷。紫石遠漫漫。何處荆卿館。行人屑涕看。

黃大兄培芳贈香石齋詩集

主人愛客客愛詩。叩門枉以新詩貽。世間埃壘不到處。渺渺獨聽空桑絲。嶺南三子調孤絕。正始遺音今

得之。偶然把卷欲共賞。竹外微雨茶香遲。

魏給諫歌

給諫名大中。嘉善人。明熹宗朝太監魏忠賢亂政。恨公不附已。逮下鎮撫司拷死獄中。子學溍奉喪還。遂以哀毀卒。鄉人私謚爲孝節先生。魏員外成憲以給諫及孝節遺像見示。作歌紀之云爾。

父爲忠臣子孝子。忠孝竭盡廿身死。縱死稱爲鐵石士。汝南范滂潁川李。若麟遊野鸞棲枳。命終園戶家屬徒。給事清裁與之比。□□不堅飛海水。牝角□木鑪鈞否。宦者一星去天咫。口含天憲干天紀。噪啞昨羣妖喜。上公發言目仰視。金印吾佩貂吾珥。東林黨人私抵訾。彼敢作過罪坐彼。乾兒稍前密如蟻。丞相御史再拜跪。頰伏但謂公言是。夜半宮門出片紙。官校盡布長安市。自云急捕奉聖旨。法司峨峨冠帶豸。見卽以氣相驅使。昔聞銅鑄開元甌。例禁門中制獄起。鐵轂加楔裂腦髓。或者懸髮薰其耳。械具一陳殘魄褫。今之楚毒復爾爾。幹肉肉飛不可止。奮力階下施鞭箠。人雖暫活與鬼倚。夜深獄黑叢荆杞。敗血入草輕塵委。一燐青凝條而紫。痛呼臬陶汝仲理。臬陶無靈竟如此。大洪先已公繼矣。浮生多塗死一軌。但願埋在西山址。得與夷齊執鞭弭。孤兒鬻鬻賴有泚。卵縱不破巢先毀。人間安能更容己。長住人間自令鄙。薊州亦有崔御史。日向高門鞞珠履。拜爲司馬千人指。郎君登科莫自侈。才劣有如生野里。目不識丁冷人齒。君不見父爲忠臣子孝子。

贈李大兄

請爲歌偈側。獨居巷南三歎息。請爲歌嬋娟。花枝泛水月可憐。看君今已非年少。顧君頃爲開口笑。況是

春光淡沲時。天涯何處無同調。嬋娟莫須詠。偁側難爲情。遊閒毋失孔公子。卒史幸名王先生。但能投分皆知已。屠狗賣漿亦足喜。醉來相和且狂歌。五岳之遊明日始。

客自江南來。爲言曾見家兄吏部乾隆甲寅歲題壁。愴然有作。

桐屐晚尋蕭寺雨。藤杯春醉石湖烟。爲看佛大題詩處。塵蝕紗籠廿五年。

陳大兄鴻壽寄自製瓦壺

茗壺製比龔春好。珍重題書遠寄將。寒意漸融如願起。晴窗小碾試頭綱。

二十二郎墨奇絕。顧孃子研又新儲。齋中有金農自製壺。吳門顧十二娘所琢研。齋頭乞取成三友。柿葉紅時伴著書。

翫茗壺口念二十八字

牀橫白木作安置。鶴與一琴同此清。卻笑著書頭仰屋。泥鑪石銚足平生。

答客

有客勤問我。我言不虛飾。澹然空齋中。朝晏惟一食。陳力既寡效。料桑詎爲得。報君還謝君。非愛高官職。

偶成

毳匝座生香。籌飛窗促曙。急與雇青春。明日官將去。官今何處去。騎馬向臨邛。當壚足取醉。莫便解金絨。



# 玉山草堂續集第三

翠屏猿嘯已卯五月至十二月

經楊忠愍墓作

官譎旋復起。上書酬主知。何堪辱師傅。未屑問狐狸。陰伎提衡日。酸辛就格時。千秋柴市血。化碧不勝悲。

土門

太行山忽斷。百折土門開。赤日當空墮。黃塵捲地來。車轟聲遠應。壁豎勢旁摧。廣武成禽處。荒涼暮吹哀。

仰和新城王尙書雨中度故關作

莫道離家情味惡。白練衣試嫩涼還。槐花疎雨聞蟬路。好送行人出故關。

壽陽驛

健兒橫行勢莫當。殺令公者夸身疆。深州急圍神策將。宣慰乃煩韓侍郎。故知朝廷無大慮。慷慨單車徑前去。淚痕血點莽縱橫。壽陽驛畔題詩處。

夜行汾上作

虛將齊扇裁。思得吳棉御。片月揭孤城。汾雁雁南去。爲我問佳人。秋風起何處。

韓侯祠歌

君不見漢王昔聽蕭何謀。能用信者信卽留。陳豨未反蒯徹至。相君之面當封侯。明年鐘室遭誅後。國士



無雙竟何有。地下終須恨人。眼前竟弗憐功狗。時乎時乎不再來。衣我食我言堪哀。千金脫手王孫意。請買淮陰舊釣臺。

曉行聞喜道中。轉繆同年廷標書。

霏霏夕露氣。日出清如沐。山曉集輕妍。草靈含衆馥。蝶新粉未墜。燕哢雛猶宿。忽枉伊人書。時就懷中讀。

樊橋驛

勸酒君知否。輕黃變柳條。秋風前路待。且可住樊橋。

曉出蒲州

泉枯馬燧營邊井。火墜苻離堡下蓬。搜盡吟懷入憑弔。一天霜月古河中。

潼關

河折抱關城。關寒浪有聲。常時稱虎視。每夜聽雞鳴。孤岳樓前迴。全秦樹外平。抽翰儻成賦。浩蕩此西征。

望華山

削成五千仞。獨立輕曹輩。勢競萬齡前。根蟠四維內。枝岐見脈絡。停積皆蘇塊。元氣發揮時。至精不雜碎。援蘿得步蹇。陟階愁膺礙。想到半山閒。已凌飛鳥背。虹銷夕顛霽。千里無餘曖。彩翠落三峯。飛光滿秦塞。紛吾年恨晚。竭與仙府對。終是汨凡塵。末由窮勝概。圖經亦幸借。桑節回看在。磬折謝山靈。高攀後時再。

夜次華陰縣贈程少尉

解鞍入華陰。欲臥意常慵。久之夜方靜。遠聞東郭春。山月皎一弦。挂在蓮花峯。蒼蒼關中樹。杳杳天外鐘。

頗聞希巨巖。上有仙元蹤。足力雖苦殆。寫景春彌重。孰是符幽情。官惠益州節。相與振衣去。逍遙愜所志。

謁西岳祠登萬壽閣二首

坻鄂豐層覆。新營費萬金。先皇勤廢薦。御蹕此躬臨。有氣神榆古。無燈鬼獄陰。穹碑字如斗。仙掌對嶠嶽。蒼茫五十載。曾記符輿經。攜手成憑眺。迴瞻極杳冥。霜新關葉赤。雲曉岳蓮青。願辦登山屐。重遊與乞靈。

經華山下作二首

峒嶢負入雍州烟。鳥度寒空翠棧連。風雨幾年凋鐵鎖。靈祇半夜集金天。芙蓉秀出三峯外。巖屐雄爭九折邊。報與少文今懶甚。逢山已作臥遊仙。崦嵫西芳舍兩三家。瀑水聲中樹影斜。陰洞蛻眠閑日月。碧壇松伴古煙霞。行空願借仙人杖。換骨求烹玉女砂。嶺嶺試登歸去罷。擬從嵩少問三花。

過敷水鎮

欺寒紫蕾脫。翦綺綠茸新。小店臨敷水。春光莫泥人。

驪山詠古四首

蓮花注水玉龍寒。樓脊松生瓦獸殘。垣下幾窠紅躑躅。上皇香輦過時看。促酒琵琶付玉奴。袈裟欲竊仗飛符。可能一片頗黎石。照見金雞畫障無。雲母陵空秋菜生。飛霜殿冷月朧明。迎娘淒咽蠻兒怨。欲撥龍香調不成。碧樹煙籠繡嶺苔。一聲方響鳥歸來。宜春弟子皆垂淚。不是當年阿濫堆。

詠霸橋柳

絲絲垂柳。綰煙痕。寫出新秋。笛外村。覆蓋門邊衰草路。便無離恨。總銷魂。

度霸橋作

水煙縈雨。作淒迷。暝樹寒鴉歇。又啼。員管更防輕捉弄。行人已在霸橋西。

長安客舍北樓閒眺

層閣平看際。危欄獨倚閒。秋聲九疊樹。曉色五陵山。久客終成倦。浮生暫得閒。市南鞭急買。滿目是河關。

望終南山

夙聞終南好。今見終南山。當胸吞楚甸。吐氣塞秦關。皎月藍田出。晴雲白閣還。慚無濟勝具。徒倚一筇閒。

偶興題白渠驛壁

世慮迭相擾。茲來消遣之。地憐新掃後。窗愛小明時。苔避筍穿石。鳥嫌人索詩。飄蓬殊自悔。禮上下居遲。

馬嵬有楊妃墓弔之

金屑方調玉骨寒。同心相保白頭難。暮婚晨別勿忙意。天上人間一例看。

海上三山別恨生。黃泉碧落太無情。霜魂只化韓憑蝶。長傍青驪萬里行。

東湖歌

鳳翔判司今老去。東湖湖水如掌平。秋荷始花殘暑退。小雨忽止幽泉鳴。絕知老樹無年臘。更喜閒蓑不世情。江南水田買得未。吾欲結誓操歸耕。

題陳倉驛後小臺

纖綵凜將捐。飛光逾易度。登臺值稍暇。坐對終南暮。灌木息歸鷗。澄燁延落鷺。中懷此何已。復問前行路。

大散關

暫對容成惜鬢斑。花開杯盞勸循環。垂楊踈地無情思。又送秋風入散關。

煎茶坪

山缺微有路。人依空翠行。逢僧試借問。此是煎茶坪。至午無所見。丁丁樵斧聲。會稽有逸老。采箸願逃名。霞上一相憶。勞歌空復情。

草涼驛歌

北棧之高吁可危。北棧幽勝誰當知。朱闌逶迤飛石架。紅樹遠近行人隨。寫生那待絹徐乞。撫景妙將詩急追。持贈老夫堪一笑。草涼驛外趁晨炊。

五星臺

凌虛寫結構。蒼突衆峯交。仰撝天形窄。深蟠地勢拗。鱗斑虺飲澗。影黑獯穿茆。莫自甘孱懦。詩成首不抓。

雨中度鳳嶺

雨從鳳山至。將曉光如夕。松頂雲暫移。蒼峯半成白。迎人噉見樹。疑虎森逢石。俯鑿一渠中。清無沙土迹。征人懷首路。爲登塗惜。安得待晴暉。巖中求散策。

彭乘墨客揮犀稱。鳳州有三絕。手柳酒也。過益門鎮。見垂柳一株。婀娜可愛。因以爲詠。

柳垂金線拂爐頭。早晚行程出鳳州。定子未來人欲醉。淡煙零露不勝秋。

柴關嶺

萬葉稠相倚。山行不見山。瘴深連石櫃。水怒下柴關。斫漆畦丁健。誅茅野老閒。營營肝肺熱。未願放羸孱。

紫柏山張留侯祠

運籌決帷幄。所願得封留。黃石一相見。赤松堪與遊。竹深常有雨。山靜忽如秋。隱默杳然際。遐哉不可求。

山行曉景

村鼓寒無次。籠銅曉尙搗。攢紅霞變火。片白月成沙。不怕偏蹄虎。常憐凍翅鴉。蹢蹢懷未已。前路是褒斜。

過畫眉關

堠去紅林失。橋回綠峽環。畫眉啼處處。已過畫眉關。

二十四馬鞍嶺

百里馬鞍道。乘高險莫當。兵形爭鬪鼠。嶺勢湊盤羊。入夏羣鱗蟄。無風萬木僵。權奇輕借得。未要逞身強。

馬道驛夜

細吟蟲不穩。牀下遠江聲。擲笛正無那。敲衣更有情。殘星依漢水。獨雁下襄城。搖落催鄉思。偏從此夕生。

觀音碓

細岑始緣延。微徑絕縹緲。一線凌青蒼。參差人與鳥。雲歸冷臥沙。瀑注晴穿篠。弭節回自思。此心猶悄悄。

燕子碓

上山當緩步。步緩人疑坐。歷歷憶所經。絕奇慘么麼。楓根老易斷。巨石砉然墮。葉下禽悄飛。猩猩啼向我。接筒覩泉脈。梯木收山果。遇險不咨嗟。昔難今亦頗。

登七盤嶺

岡巒錯異狀。恐此遺征客。壞壁蜂攢窠。蹇巖雞戴幘。太初雪不動。亭午風常夕。桀豎陽曦迴。虛臨陰籟積。寥寥慘入觀。詭仄森投隙。期與逞跳躄。終難禁嚙嗜。大荒極萬里。我獨今安適。覽鏡試磨看。羸骸忽成腊。自褒城至沔縣。數十里間。稻田豐饒。水竹清美。輿有所寄。偶成四韻。

隨意築村墟。江南定不如。桃源有雞犬。栗里足琴書。飯熟午眠罷。酪新秋賽餘。遺簪許他日。便乞沔南居。

女郎廟

女郎廟口神鴉飛。女郎山遠采旄歸。竹深翠袖望不見。日暮天寒聞搗衣。

諸葛忠武侯祠

渡瀘心力盡征蠻。哀輓音從隴上還。一代文章出師表。千秋魂魄定軍山。金刀舊歷銷沈際。玉壘浮雲黯淡閒。聞說遺民有私祭。秋江灑淚送潺湲。

大安驛

果然逢絕阻。亦足快冥搜。境峭經羌道。遲徊度隴頭。聞雞五更壯。射虎萬山秋。誰信秦川客。臨衰厭遠遊。

五丁峽

齋糧下秦棧。紆軫經蜀峽。預揣險適符。稍延情轉怯。窺叢隱般首。撥翳吟鴟鵂。有脚石爭前。無根雲倒插。

潛行港洞底。仰視屋屨狹。冰雷惻崎傾。風囊怒呀呬。沍寒霜五月。白晝陰一霎。乳落泉眼爭。藤垂崖背壓。前行我實殆。寫景茲寧乏。綠厚澗旁穿。紅霏路斜夾。惟防野仲出。且與狙公狎。登陟發遺篇。明將卒吾業。

五丁關外眺望寄林三兄太守培厚

遠望情未已。山木寒竦竦。陰氣來武都。黯然失蟠冢。忽思顏鮑侶。今荷專城寵。芳札遲相貽。兼金詎爲重。出五丁峽次漾水上作

柏林驛

不教壯士死。一線絕歧梁。嗣黑囊蟾守。龕幽黠蠹藏。何人翻牧犢。要路惜亡羊。留恨成憑弔。蒼濤接混茫。漸近三泉縣。城頽日易昏。風煙積河隴。氣色雜羌渾。山折盤蛇路。林藏謝豹村。髮逋求一理。白盡不堪論。

百牢關

可合耽奇趣。西南是百牢。峯欹鷹腦墜。頂峙虎牙高。老樹撐天直。春湍盪壑豪。眼昏渾得醉。不爲困香醪。籌筆驛今名神宣驛

轉戰街亭憤未摠艱難微道問軍儲漢朝創業三巴路蜀相談兵一卷書合擬蕭曹契魚水欲迴天地臥茅廬可憐星落前軍夜五丈原高恨有餘

龍背峒歌

鐵鑄不牢山破碎。老龍銜銜走其內。人來亦作婉僊行。直上青天踏龍背。崩雲墜動駭梭擲。噫氣腹空催鼓搗。石銛錯認齒磨金。松老俄驚甲成黛。茫茫眞宰不可問。喜向蠻荒逞三昧。一境回看示一奇。那容更

作尋常態。此邦之人素習慣。到眼亦要心竊怪。何況老罷今白頭。支離委絕誰能耐。桃竹紫皮願憑仗。騷  
驪朱汗愁妨礙。須臾拍手舞且歌。出險始知大自在。

### 朝天峽歌

箸不得舉心茫然。朝天峽險龍洞連。百夫攀索恣呼叫。徑路直在虛空懸。將行忽作齟齬勢。斷齟一吐紫  
萬千。急與相角漸相習。怖至欲死翻安便。梭桲葉肥棧樸老。四圍微許光漏穿。頗聞上有籌筆驛。遺跡試  
問村無煙。午時風起山墨色。亂雲如馬爭欲前。山耶雲耶不可辨。三步五步徐蚤緣。眼中豁見日杲杲。自  
謂直窮雷雨巔。回看窳窳尚無際。蜀道果爾如登天。寺僧進茗擣薑汁。勸能飲此疲殆蠲。暫取復置起憑  
眺。晴光物態無遺妍。人生苟有四方志。須尋名山浮巨川。縱逢奇險亦快意。腹內底用膏油煎。乘流則逝  
得坻止。囚拘日擱殊可憐。明朝崢嶸劍閣道。莫避蛇虎當揚鞭。

### 千佛巖

指石說法石性堅。具石卽爲金仙。昆吾鋒淬誰所鑄。平生苦爲情網牽。擺脫難比溝坑填。雞足之峯生  
面前。妙相有若晶珠圓。狀或窈停袒兩肩。不祖於世皆真禪。彈指一化十百千。爲欲禮拜去遷延。言有滯  
有非自然。一聲磬響空林烟。帆歸蜀江平到天。

### 廣元縣城西江館晚望

秋色來巴西。憑高望不迷。月輪沈地闊。星勢壓江低。有暇杯宜引。如狂筆謾提。明朝須送客。何處是蒼溪。  
行昭化道中。望嘉陵江景。忽有汎舟之趣。



扁舟紅樹裏。細雨出嘉陵。未辦攤錢好。偏憐聽鼓能。沙平繫雁路。水漾織魚罾。不惜千金價。江村買景憑。

桔柏渡歌

益昌縣外水連天。桔柏渡頭初弄船。朱霞徐合遠寺刹。白鳥斜入秋江煙。最宜賢者傾百榼。政要先生留五年。興來臨水偶一睡。放散恐忤青城仙。

昭化江館晚景

暝色葭萌縣。紆餘廣漢連。層軒清面水。羣峭遠摩天。轉磴千絃雪。燒畬百稜煙。忽聞猿嘯起。落木浩無邊。

雨中發大木驛

雷鳴怒拔湫。百折下牛頭。白雪森鹽井。青山出劍州。磨崖思詠古。傳箭罷防秋。倚賴身輕健。年年愜壯遊。

過誌公寺作

崎嶇十餘里。橡木自成林。何處誌公跡。空山宜獨尋。松閒聽清楚。了了風泉音。我欲抽藍脇。於茲寫素襟。

晚來開士至。識此淡然心。

劍門

天半豈宜豎絕壁。剗成竟無鑿斧跡。兩邊萬仞門中坼。一女子當丈夫百。瞋目不用操矛戟。赤泉侯驚馬辟易。愛奇吾有征南癖。苔蘿欲捫手且釋。一片黯黯媻媻石。爾魂毋悲安爾魄。出門固合稱長策。不者眼界誰開闢。仰頭問天恐天惜。重交自用三錢擲。此生更著幾兩屐。

石洞子歌

一步一回求恣意。峻鳥暫下陰容易。木枯墮澗全吐芽。碑圯填泥半成字。擔簦屢負滄江春。伏枕何嘗羨隱淪。十倍足收風景好。莫辭長作左綿人。

雨後行劍州道中

潺潺谷送響。山翠曉來看。最苦東津遠。彌驚素節寒。竹斜求路礙。雲重度溪難。失喜巢閒鵲。歸林尾漸乾。

詠劍州道旁柏樹

借問千根柏。種來今幾年。劍門秋色表。遠眺正蒼然。香葉寄孤賞。清陰成一圓。懷哉君子志。歲晚昂貞堅。

武連驛

武連驛畔偷閒歇。暫解塵衫乞洗鞢。茶味可憐鷹爪嫩。鄉愁莫說繭絲多。

郎當驛懷古

郎當聽罷淚傾波。閒教張徽一曲歌。興慶宮中山驛夜。不知何處雨聲多。

梓潼山文昌宮百尺樓

岸幘且相於。逍遙勝躡虛。銅陵霞客隱。玉洞地仙居。莎老殘春候。松圓累劫餘。煩心如草穢。到此亦芸除。

水觀音祠口述二韻

蕭然塵膩遠。一几與一拂。非無客噉名。且信卿圖佛。

板橋驛晚景

板橋欲去未能去。恰好門生籃盞遲。看殺沙頭雙白鷺。荻花秋水晚晴時。

翠碧雙雙學舞嬌。幾芽芳籜弄清颿。不須更憶宣州路。且趁斜陽度板橋。

魏城驛雨夜

急點到牀前。秋池細雨連。聞更初倦夜。作客已涼天。漸遠蜃孤咽。將昏燭半偏。如旗飛念有。共入一江懸。

雨中經銅瓦鋪偶成短歌

連山騰空湧波浪。飛廉屏翳驕相向。勢力突過菩薩象。狹巷車奔數千兩。決臆忽疑詞大放。又爲兩軍交。掣狀項羽叱咤樊侯壯。垂脚森森百千丈。羲和鞭日那得上。我口嚙呢心惆悵。急足到來神不王。叉手叉報涪江漲。

涪江晚興

我覺涪江好。斜陽一道鋪。彎彎遠成字。汎汎嫩如酥。蠶市花開落。鵝溪絹有無。年年春色老。把釣負南湖。

發綿州渡安昌水寄長安相知

蟲聲豆花落。南德新水生。始發安昌櫂。回望綿州城。序改芳始歇。襟分歎遂盈。思君指孱水。只解送南征。

漢州

暫展文鴛被。欲眠金雁驛。無情却有情。一夜巴山客。

廣漢驛夜書懷答林太守三兄

銀塘新水落紅蕖。枕上懷人未得書。今夜秋聲誰共聽。西風雁水雁來初。

彌牟鎮八陣圖歌

行邁昔過定軍山。祠堂柏樹森森閒。今晨復到彌牟鎮。蹶足沙頭看八陣。陣圖如棋如九宮。壁壘外布虛其中。爭奇自具常山勢。據勝非爭背水功。行藏兵勢誰能測。鷓鴣治之文羨門式。駭駭土伯無汚人。如穀靈蛇吞不得。夜來蜀魄啼空林。玉樹宮南秋狄吟。老兵頭禿話遺事。銜恨萬古江流深。眼前惟見石不朽。誰與此石爭長久。君不見液銅鑄鼓加萬釘。世閒絕無蠻洞有。

過新都縣問楊文憲故宅不得以詩弔之。

每依南斗望京華。飄泊天涯是海涯。一死但容蠅作客。三春難逐燕還家。行吟澤畔生芳草。招隱山中發桂花。終是深恩漢文帝。憐才暫遣到長沙。

答人問近狀

生事勞相問。秦州更益州。裹茶看玉井。戴笠下金牛。睡早常妨月。疴綿獨喜秋。防人噴懶惰。過午卽梳頭。

蜀中六賢詠

司馬長卿

賣車貰酒舍。禮法自然疎。一自爲郎後。能陳諫獵書。茂陵秋草遍。消渴問何如。

嚴君平

居肆頗有需。得錢乃爲筮。午時下簾後。足以供生計。時復與人言。賢哉非棄世。

揚子雲

西京有文章。絕手推司馬。龍骨銘繡補。薦雄文似者。借問今何官。草元泊如也。

陳伯玉

琴碎我不惜，怪茲陳拾遺。詩名一日布，用意吁堪悲。不是驚流俗，悠悠那得知。

李太白

出門西向笑，李白願朝天。晚愛牛渚好，吟詩凡百篇。西江秋月下，老却酒中仙。

蘇子瞻

清眺數期程，暮顏述飄蕩。誰憐文雅客，甘作江湖長。擬以方朔諧，淺之實大枉。

鑠院秋夜雜詩

絡緯聲中未曙天，教鋪筒簾又遲眠。此情只有銀河識，六十年頭已卯年。戊寅歲八月，夢中得二十八字云。

簾卷秋光畫燭邊，輕涼如水碧雲天。銀河悵望吹笙夜，又是江南已卯年。蓋先大夫以兵科給事中充江南副考官，賞乾隆二十四年已卯也。今日在鑠院，回思往事，悵然成此。

小窗深鎖月朦朧，燈倚金羊戰碎紅。不是素娥煩不耐，桂花涼惹一身風。宣華苑廢草成窠，花落花開怨綺羅。認得當年鋪錦處，雞頭菱角已無多。

東城晚望

蒼翠嵩岑畫堞齊，平郊黯黯夕陽低。何年兵氣銷銅馬，終古江聲撼石犀。諸葛祠空惟柏在，蜀王陵失有鶻啼。諸山合自岷峨始，他日窮探乞杖藜。

曹方伯六興，韓廉使文綺，招遊工部草堂。

幾處清溪水。潺潺直到門。沙平宜步履。舫小趁移尊。容易疎籬插。荒寒老樹存。應煩理瓜芋。更築瀆東屯。  
謁杜拾遺祠以詩歎之

縱使詩千古。其如餓死何。艱難生理賤。涕淚主恩多。心惻吟梁父。魂沈語汨羅。向來雄傑態。天馬有長歌。  
將出蜀。門生鍾士熙。表姪許錚。內弟邵壇。送至東門水上。去後。悵然有題。  
到來每說辭家苦。欲去還如別舊鄉。莫道人生腸易斷。最難斷却是愁腸。

### 江興

蕤蕤魚尾錦江霞。細織鞞紋浪花。渲出紅深與紅淺。可憐宮纈罨晴沙。  
不須蠻榼苦相酬。好是身爲萬里遊。楓浦橘村都過了。船人使槳下眉州。

### 詠江中晨霧

珠作流颺玉作埃。波澄輕素剪刀裁。捲簾不惜妨春夢。一夜梨花萬樹開。  
爛銀宮闕海漫漫。入畫青山隱几看。素鳳玉龍呼不起。寶光雲裏度春寒。

### 眉州城下權歌四首

寒流凜凜響。催過臺頭山。人去有還日。水落何時還。  
但怕行路遲。不知行路苦。嘉州問何在。統統寒譙鼓。  
古便那須喜。風回作底愁。使船如使馬。火急下烏牛。  
南人意歡喜。北客急還家。相與歌一曲。船頭軋軋鴉。

雨景

人煙寒不起。終日雨來時。側側飄成漲。絲絲散作絲。平橋鬱姑水。小樹竹郎祠。舟子噴薪溼。頻眠晚未炊。雨中過嘉定。不得望峨眉。戲作短歌。

平羌江水平如油。起櫂明日到嘉州。峨眉山好得見不。黯黯微雨沾清秋。欲往從之塗路脩。側身西望意夷猶。炊煙重壓林葉稠。炯炯空自揩昏眸。豈是貴人呼八驕。方麴障面窺無由。吾生亦有金蘭儔。千里一去不可求。又若簾墜珊瑚鉤。美人擁髻樓上頭。翠黛遠睇凝春愁。曳筇昨日蠻海陬。有屐未暇登羅浮。時序倏忽今四周。八十四盤清而幽。光明之頂限窮搜。天意慳我爲我羞。夜來風怒名石尤。顛倒頓爾出良籌。漏天一月難罷休。便須經歲此淹留。買取蓑笠百無憂。看山笑傲凌十洲。勝蚡作相奴封侯。芳桂爲檝木蘭舟。嗚嗚戲作巴童謳。漢嘉守者爲我酬。一笑更作凌雲遊。

登嘉定成二十八字

碧縈香字午風柔。激灑金船小閣頭。醉裏莫輕揮袖去。一支春水負嘉州。

峨嵋山月歌

在家見月時。儼若長相思。出門有離別。復見峨嵋月。月出始彎環。江樓暮鶴間。餘淒先委樹。細彩尙銜山。山頭月漸上。滅燭生惆悵。鳥巢自南飛。行人舉頭望。望月月墮江。移冷挂篷窗。低頭招月入。月碎霜華溼。引月覆秋衾。秋痕何處尋。參差船唱起。一夜清溪深。清溪水可弄。曉色縈殘夢。入懷如更親。偷眼成相送。相送復相留心。將月共愁。江波不解意。催櫂下渝州。

眞武坨上卽景

巖藤挂密陰。暫欲洗塵襟。丹嶂逢皆合。青溪轉益深。鷗呼攜笛聽。漁唱入花尋。更有忘歸處。松泉漱玉琴。

宜賓縣

曾讀南中志。茲遊意不忘。江迴通胸臆。縣古問螳螂。雲吐兜羅白。林銷夾纈黃。他年此逃暑。荔熟恣分嘗。

南溪贈仇同年如玉

縣官清似水。水在縣門前。別占花成嶼。新規屋似船。春租收白小。曉飯杵紅鮮。盡日無公事。氓情益晏然。

泊瀘州城下作寄鍾士熙

出門渾忘遠行苦。篙楫健似梯衝舞。乘儻直下銅鼓灘。放溜已失朱提部。故人接迹成阻修。乃獨使我增煩憂。夜來眼見刀懸屋。徑轉樓船下益州。

合江縣曉發

漸與黔中近。遲留不肯還。鄉心啾夜鳥。江路入秋巒。書答將緘懶。詩來欲和慳。曼容如一顧。休唾此身頑。

白沙鎮人家

老翁不相識。一見卽情依。禮數山中簡。桑麻秋晚稀。壠平雉每下。巷晚牛方歸。爲說今年稔。村村梁稻肥。

斑竹坨上晚步

相過卽懶去。幽獨小村邊。問我何爲者。移情蓋有焉。蕉深圍野屋。蔗熟臥溪田。戲說先生履。頻遊不怕穿。

巴縣城下舟中與楊編修希銓翫月作



遲遲桂櫂發。稍稍蕙樓清。念遠情無已。流光魄已生。良時感金素。前路渺滄瀛。賴有佳人召。殷憂得暫輕。

林太守培厚。招楊編修二兄同遊塗山。題真武院後小圃。贈延清師。

登塗山絕頂望郡城作

夏王祠屋一荒邱。發興籃輿到上頭。絕叫猿雌悲永晝。孤盤雕鶚眇清秋。山連熨道披圖見。水下巴江作字流。形勝漫誇天塹險。佛屠飛渡舉烽愁。重慶郡城。三面瀕江。明季。流寇從西南佛屠關入至城下。城失。其險遂不守矣。

別林太守三兄

總角成情好。分攜老大時。燭燈感今夕。弦望問前期。落羽栖方急。浮雲去故遲。滄江遊子意。日暮竟何之。

始出巴峽

雲府晝冥冥。浮嵐不盡青。蕭森想終古。吁駭此初經。鴉集寒柯重。蛟潛積水腥。渝歌喜相待。晚例泊江亭。

木洞驛阻風不發

依依良友闊。浩浩歸程修。及爾將凋暮。翻然作滯留。斜暉沒孤戍。暝色延雙鷗。客意方無已。天邊一葉舟。

明月峽歌

文漪錦石路回環。花影碎鋪苔一山。明月峽前人不見。扁舟沿月櫂歌還。

涪州歌

挽船聞過青崖林。李渡橫梁少定居。日日望書書不至。看郎一似涪州魚。涪州江心有雙魚。刻石上。每一魚有三十六鱗。出水則年豐。

晚發葫蘆磧次花林舊驛

溪色枕漁煙。沙棠去淼然。霜林徐辨際。風纜遠隨邊。遙韻披帷集。輕漚拂槳圓。寄情憑楚乙。書字滿江天。

發忠州作

迴艫脰苦悄。望古心誠癡。圻岸遠參差。東坡復何在。

南浦曲萬縣城下作

銀鞍莎雨路。珠履花塵迹。王孫去不歸。春草年年碧。

江晚寒望偶成二十字題書後寄重慶林太守三兄。

亘望初成別。輕寒復變秋。不宜煙水晚。滯雨楚江頭。

廟漑子歌

岳帝祠下雲作屯。水漱萬古蒼山根。怪石如鬼如獸蹲。千人之力爭一門。失手恐致蛟鼉吞。鳥飛不及禁馬奔。百里那用經晨昏。吾生賴有忠信存。敢易駭汗爲壺樽。題書乞與孫宰論。不須翦紙與招魂。

望夔州城下諸山

雲安山景天下稀。山氣作雨晴霏霏。石橫細路一僧下。松露半巢雙鶴歸。鮮颺綵虹擅窈窕。秀芳紫裏相因依。此生劣劣復何苦。明日提壺上翠微。

江邊翫月

不是難成寐。前宵與月期。乍逢簾卽卷。徐賞簾方移。波絢遊睢誤。山明入剡疑。螢飛亦相照。冉冉露盈枝。

八陣圖

八陣圖重見。維舟夔府東。何時布箕翼。幾輩閱沙蟲。日瘦低沈水。星乾急墜風。勒銘誰識此。慷慨憶桓公。

灑灑

萬流爭匯處。巨石屹當中。半黑慘陰氣。孤青插太空。龍噴洞口靄。狔拜浪頭風。洗竚一相酌。茫茫疏鑿功。

瞿唐峽歌

十月下瞿唐。不用戒舟航。舟航發何早。更憶陽春好。陽春景態最天斜。鏡中水綠飛桃花。射干揭車齊吐芽。細若金子鋪秋沙。江陵前去一千里。安穩行人直到家。

瞿塘竹枝

本是新安人。愛作西州賈。一過瞿塘山。淚落酸腸肚。

三月說還期。經秋峽未下。不知風水難。定復嗔書詐。

夕陽

扁舟載得夕陽還。影散秋穹碧靄閒。費却胭脂水千斛。爲君濃染麝香山。

夔州歌四首

草縷茸茸綠未齊。蘆錐短短不沾泥。一方軟艷春波樣。拋却猶難是灑西。

擔梢急下虎鬚去。拽綫喜從魚腹還。遊賞且容稱賸客。休吟山上一重山。  
一棹山栗味新鮮。蒸裹焦糖下箸憐。更好倉曹貽酒醬。黃魚取飽不論錢。  
紅椒梔子態交加。百舌聲添市暨譁。他日繫舟蠻井絡。稻香多處便移家。

巫山縣夜雨

浮涼遽不禁。頭苦共涔涔。碎滴巴船夢。繁催郢國砧。蛩鳴孤驛靜。人坐一燈深。誰送烏程釀。中宵費獨斟。

巫山高

巴浪白如鵝。巴船去如馬。荻蘆吟兩岸。急雪霏微瀉。忽聞官鼓聲。已次巫山下。巫山亘不斷。宛似錦屏張。隱見綠熊挂。參差綵鳥翔。峯窠鈿攢點。沙尾練浮光。稍焉入蒼靄。秋色凝如黛。黝失時陰晴。青忘山向背。雲過檜葉香。瀑濺苔花碎。沿流西塞通。極目路難窮。桂渚片帆遠。荆門煙樹空。不知寒翠裏。何處細腰宮。

巫山

三峽七百里。巫山十二峯。清光展圓繡。彩色飛杉松。石裂苔纏古。泉春乳滴濃。岷峨那抗此。林路富元蹤。

望神女峯

神女峯。嬋娟。峯幃獨立邊。桂熏霏水霧。鬢翠擢秋煙。凝黛南湘遠。含愁北渚連。高唐更何許。臨望但千千。

神女廟歌

楓落楚江晚。蕭蕭江上祠。殘香萎露蕊。疎影亞風枝。不聽茜裙唱。荃橈欲撥遲。

神女廟賽神歌

水上神鴉自作羣。翩翩落葉遠難分。雲鬢霧鬢知何處。竹色蘭香一奠君。  
巫峽聞猿歌

人聽猿鳴悲。我聽猿鳴喜。迢迢枕上數行程。歷盡巴巫一千里。

巴東竹枝

橫肩柳栗苦匆匆。走馬應官笑轉蓬。爭似布帆千幅好。送人無恙出巴東。  
排行石壓筍千窠。飲水猿輕挂綠蘿。更好官人容穩坐。業灘灘上少風波。  
屈原沱水買薪罷。虎角狼頭警過中。自有歸州長年在。閩嶼底用選篙公。  
下水舟鳴十枝櫓。上水舟憑十幅蒲。兩舟逢著遙相問。前去新灘水落無。

歸州權歌

灘近兵書峽口平。舟穿人鮓鬢頭輕。蜜蜂蝴蝶防偷覷。官吏前邊正唱名。

歸州

秋氣易蕭瑟。秋聲難具論。梧零宋玉宅。雁落明妃村。望迴怨方蓄。念離情益敦。汀洲無限路。未可擷芳蓀。  
三閩大夫廟

掩涕沾余襟。蛾眉謂善淫。靈修迄不悟。謠詠恨何深。森森丹陽水。蕭蕭楸樹林。漁歌晚忽斷。淒人女嬰砧。

舟中臥疾未愈夜泊舊歸州偶有題

爲信秋來減帶圍。未寒先欲授寒衣。孤燈急管相欺意。臥聽潮聲泊秭歸。

黃泥三堆守風歌

橋鳥悄自語。今朝天氣寒。兒郎且安坐。慎莫下新灘。  
如畝作大浪。吹塵起颺風。風頭攏兩手。只欲罵灘公。  
候風候一日。冥然風不住。即便附來舟。直帆歸巫去。

新灘歌

西望咨嗟蜀道難。津亭十月北風寒。勸君且莫推辭醉。險絕新灘勝澀灘。

從兵書峽入空船峽

纔忘三峽險。入險忽茫然。唾竈氛濃集。呀阨水怒填。漩深羣舸避。影凸一峯懸。擬續山居賦。奇情愧不傳。

落日江望

荆王館乍失。巫女峯何在。落日千里中。秋江淡無類。要君君又去。空解陽林佩。

黃牛山歌

戴月望黃牛。從朝便及暮。黃牛欲笑人。那得人如故。  
請謝黃牛道。浪自爲儂愁。雀竿風稍定。明日到沙頭。

西陵竹枝

西塞山前箬笠斜。網魚不許下魚叉。魚寒得汕如家裏。穩坐船中莫憶家。  
才過南津是下牢。新剝桐壳小於刀。峽州來往歸鄉住。奚怕夔陵白浪高。

宜昌舟夜聞笛

幾片飛花入洞庭。一聲秋水落空船。夢回底事增惆悵。曾在江南獨夜聽。

小睡罷已發東湖偶拈二韻

艱難飽歷夔巫盡。旅思須憑睡思降。錯聽猿聲復驚起。一枝柔櫓下荆江。

十二磻下汲泉煮茗歌

先生嗜竹兼嗜茶。綠雪墮椀浮輕花。先生飲茶不飲酒。持杯嗟如箝在口。蝦蟆磻下飛櫓行。吻渴無奈秋江清。仰看懸瀑不計丈。灑破青壁珠琮瑋。木瓢瓦缶紛安置。茗材雖粗亦足試。一澆徑洗千埃塵。不信劉輿使人膩。誰移美箭植此閒。使我益得開心顏。莫道中山千日好。明朝更訪武巨山。

宜都江中雨後晚景

不待看人醉。片心今已降。絕憐鵝戲小。頻得燕來雙。殘溜細穿草。遠山晴入窗。櫓歌來益好。爲報近枝江。

過枝江縣

寒江晚更清。盥罷別愁輕。蓼折紅邊過。萍開綠處行。尋煙問來客。盡日記歸程。瀉瀉閒時到。沙頭主送迎。

楊溪晚發寄江陵李明府

相隨余叶契。一去子牽絲。孤櫓松滋發。懷人暮雪時。緘芳將有贈。江上攬瓊枝。

松滋江口守風排悶作

病從子月損。路出漢江賒。舉足封來往。吟詩益歎嗟。聲柔蓬委草。沫細浪驅沙。亦怪頻宵夢。遲回不到家。

灌子灘雪霽

柳梢斜壓荻碇寬。查上銜魚一鷺寒。到晚請君俱入畫。紅衣青笠揭篷看。

江陵舟中誦林三兄贈詩。因寄重慶。

江空微有樹。江遠不生雲。直望一帆去。渺然千里分。冷花銜簇簇。素浪逆沄沄。茲夕荆南路。吟秋爲憶君。

沙市歌

江陵候吏至。舉頭向東指。郎今心莫煩。前去沙頭市。

沙市漁舟

溪邊風急葦條斜。溪店寒梅小著花。暫借蘧蔭作帆去。遙林一簇是吾家。

江陵歌

金烏翅轉與歡別。比目魚來定憶歡。不識揚州在何處。逢人只問那呵灘。

江陵詠古

斑駁霜華入鏡中。舢船到手百分空。未宜小雪殘年裏。走馬閒看故渚宮。八及之名安在哉。沔江南去有荒臺。登高極望天欲盡。日落野鷹無數來。荊州鯽魚賤易買。若比名士定遭噴。亦有秦川貴公子。年年牢刺歎依人。悔營天闕望牛頭。東閣牙籤一炬休。寫出霜冤泉憤意。枇杷門外楚山秋。江關一去小園蕪。鈔譏年年憶故都。老欲狂吟誰是伴。可憐柱國有家奴。



建陽驛遇微雪

舟遲雖不樂。路已歷三千。此日輕投館。前行快舉鞭。荆襄龍戰地。風雪鶴盤天。欲訪違盟事。悲林晚颯然。

宜城

孟六今何在。秋墳草不生。且從葛彊去。買酒醉宜城。

旅夜有懷

團團籬墜菊。淒淒天雨霜。江邊一聲笛。今夕臥襄陽。淹薄衣裳晚。逶迤浦潏長。懷君金錯贈。天末永相望。

萬山

昔聞神女遊水濱。交甫不復知何人。目挑數步悵然失。千年洞壑長含春。春煙一帶如秋碧。愁絕今朝漢皋客。日晚冷泠環珮聲。山空葉滿無人迹。

襄水歌

舒州杓在不肯飲。如此漢江新綠何。欲去行人復回首。鵝兒輕蘸鴨頭波。

襄陽詠古

乘時不復臥南陽。無命空悲將略長。付與斷垣荒井畔。成都舊買百株桑。此生百年駒過隙。峴首亭外看遺跡。龜趺剝落檉鬢間。至今人道羊公石。征衣一半是征塵。羈絆江邊欲老身。風雪疲驢出關去。詩懷清絕愧斯人。年年作事苦低迷。未曉將昏醉似泥。行李今朝急裝束。含情又上白銅鞮。

南陽見鸚鵡

飲啄非殊衆，翩翩惜羽翰。難忘故人贈，且作侍兒看。教語妨春睡，加籠惜曉寒。隴西如見憶，爲報路漫漫。

蟋蟀

促織幸相借，寒衣今已成。未眠驚放翦，欲碎誤敲箏。殘月離閒影，西風枕上聲。遙天有歸翼，辛苦亦宵征。

書中意

老去耽疎放，居成慰寂寥。溪晴逢曉浣，塢暖集春樵。鰾菜留賓辦，蠶桑抵稅饒。隱君銜自署，不待左思招。更勞詢近事，斟酌與君論。長物錦江水，衰顏金馬門。謀生猶藉祿，揣分況承恩。聊誌他年約，田南學樹園。

與十舍弟別十月矣音書未至悵然念之

欲別言千萬，惟忘見面期。直令髮易素，未信酒成悲。餘斐渚蘭發，疎紅園槿衰。題詩儻相獻，今夕浙江湄。

晚次舊縣

朔風悽以厲，漠漠黯塵沙。不念時將晚，惟憎日易斜。關寒迴百雁，路折入三鴉。請問昆陽戰，千秋一歎嗟。

襄城霽雪

丹林結瓊霧，翠筑吐瑤芳。驕踏花驄去，春風借助香。

北邙山歌

君不見北邙山，纍纍昔人墓。墓門殘碑半已仆，石馬橫斜望無數。欲弔當時冥漠君，短亭長笛關山路。

洛水吟

沈吟宋玉賦。高唐瞥見驚鴻水。一方暫借芳苔翊翠羽。更憑疎竹弄明璫。流雲輕雪縈塵細。碧石清波惹恨長。日暮情深伊闕外。尙疑眉黛望君王。

王子晉吹笙歌

愛坐霞牀捉鵝頸。低頭一聽翠簪斜。山風未起鶴自睡。閒殺碧桃無數花。

渡黃河

渡河將北去。河水流湯湯。空際遠無色。行人獨永望。孤坻接廣武。繁葉辭滎陽。欲作苦寒奏。眷言懷不遑。經凝郭驛詠。獵探得排字。

將軍姓是柴。出獵擁彭排。折阪騰升易。平原瞥過纔。弦驚鴻嘯樹。槍急豹投崖。西第將歸晚。燈紅唱一街。

修武驛晚望

多酒行復罷。經簷日易晡。河聲入夜動。野色到天無。旋舞鷹條脫。驕行馬病蘇。龍鍾老夫笑。舉步索人扶。發淇縣

行役逢歲晏。淇上今旋歸。叢薄人自語。茅簷雞下飛。方懷簡書促。復惜同袍違。時有林間雪。霏霏沾我衣。

湯陰岳忠武祠

西湖每修薦。遺廟復經過。弓箭英靈在。丹青歲月多。招魂悲雪窖。灑血泣金陀。因憶涇原將。恭州恨若何。安陽

斗大安陽縣。當時虎據稱。行宮舊襄國。戰壘古韓陵。飛葦黃衝壘。平蕪白剗冰。狂來付林酌。未厭酒如澗。  
鄴中詠古

朝朝歌舞此閒來。掩泣君王遺令開。錦瑟未彈絃已斷。三更殘月下漳臺。銅雀臺  
書裁五色鳳翔空。鞞盛香塵鹵簿雄。今日建春門外路。寒鴉飛出石王宮。石虎華林苑  
萬人家在濠西畔。含怨嘯嘯鬼哭聲。壞道豺銜羨藜出。深林狐戴燭體行。儒體臺。

最思

橋南風色酒家簾。郭外垂楊黃篾樓。荷芰一陂人放鴨。最思買夏過磁州。

欒城驛壁上有題七言絕句云。人生最苦是相思。夢醒翻嫌入夢遲。酒滴珍珠紅暈在。窺人明月半  
牀時。因用其意和之。

教啜□□搜病思。憑添半臂壓吟肩。夢回香燼燈殘候。獨自欒城驛畔眠。

聞彭秀才兆蓀亡字甘亭。鎮洋人。

北闕上書聊復休。詩清孟六許相酬。江山寂寞斯人老。却望吳門是蔡州。秀才詩與黃縣丞景仁相伯仲。近時名

家。無能及者。

衝塵秃尾行雞塞。背錦奚奴出雁門。鶻粟何人寫哀怨。聲聲企喻與招魂。秀才邊塞詩極雄偉。

題顧處士炎武亭林詩集後

不知世有鍾譚在。漢什唐風用意深。破盡楚氛排筆陣。買絲真欲繡亭林。



# 玉山草堂續集第四

蕙露松烟蘭風桂月軒吟藁甲申冬乙酉

歲暮偶爲絕句。貽諸遊好。

采雜朱藍柱贈時。眠花如醉看遲遲。寶書暫掩膏鑪絕。吟到江郎怨別詩。題江廣文爾維行卷後。

西頭屋是詩人住。日日雲箋手自裁。好是綠楊三兩樹。平分詩景過牆來。吳舍人蒿梁居斜街。吾西隣也。

紅豆莊荒人不見。元和惠侍講視學嶺南。提屬後進。門下以詩見者。有五子之目。侍講自號紅豆居士。北田五子絕

追從。粵中陳元孝、梁器圃、何左玉、何不借、陶苦子、以詩相倡和。號爲北田五子也。儒冠挺出儀卿繼。識面將

毋愧李邕。寄贈南海儀克中。

新篇如錦勞相寄。三歲頻看懶未酬。若縮垂楊寫詩思。春風題遍武昌樓。費同年丙章枉以監試楚省。新什寄示。

三年未能酬也。

日作官人夜詞客。蠟烟紅舞海棠梢。可憐蜀紙今騰價。金谷遺音已遍鈔。周同年之琦觀察蜀中。所作小詞甚工。

一麾暫去海東頭。馳傳還爲諭蜀遊。臘盡細傾天正雪。蓬婆城外望松州。尹同年濟源。由延平守遷四川松茂道。

朝朝趨府燭籠紗。讀罷鄜經午放衙。爲許更招詩弟子。小窗風暖破紅茶。陶同年梁。觀察清河。方輿舉畿南水

利。處繁劇之任。不廢吟咏也。

無琴無鶴使君廉。遷職三朝足辦嚴。叉手上車成一笑。尙頭豬鼻載牙籤。林同年培厚守天津。遷爲大明道。載

書而行。

不見李生三歲餘。天寒餐食復何如。養和欲寄無憑寄。孤脆鱸肥憶索居。李大兄爲崇羅滯大名。

西山片雨逐鳴騶。好句都從馬上搜。笑擘紅箋春獵罷。邵陵新府在江州。李大兄爲鈺。雅擅詞翰。由勛衛出爲

臨昌副將。

勞思如遇戴安道。用筆已窺楊契丹。蕭淡之間見情性。無多著墨與君看。朱八兄鶴年畫入逸品。

黃絲驛外路盤蛇。者卜河邊浪浴沙。笑殺使君行李重。半肩詩草半梅花。程侍讀恩澤視學黔中。己及二年。蕭

然如贊士也。

山圍破額濃於黛。水瀉青林滑似油。爲報蓬萊新侶伴。詩人例許住黃州。張大令維屏。方攝黃梅縣事。大令工

詩。有松廬詩集。

試劇將邀鶴板除。東歸不爲憶鱸魚。金鈿秋盡懷人夜。未得西津一紙書。李明府培謙試吏山西。遭憂歸里。久

不得消息。

銀鬢小女髻堆鴉。卷葉吹笙狷子誇。嘔魯麻香酒名三日醉。漢郎苗人呼官爲漢郎。且住莫思家。從兄桂爲思

州守。

含酸脩眵作分攜。急待團圓夢轉迷。寒逼紙窗聞雁候。長安風雪晚淒淒。舍弟杜客南陽。適將寄書。因題書後。

詠殘雪

一曲儷幽蘭。春庭積素殘。滴簷成乳易。委砌覓花難。酒重傾螺滑。香微抱兔寒。且禁輕掃去。留與謝莊看。

詠倦

都覺春來倦。能知倦趣不。忍寒花飢眼。禁病酒扶頭。硯污池常耗。棋殘局未收。西堂夜來夢。一半尙句留。

自直園歸書景寄所知

借馬來歸院。街長我不嫌。尋常詩債了。軟婉睡魔添。竹字水千叮。柳花風一帘。憑將無限景。題錦寄江淹。

過白尊師道室奉贈

偶拾陰君簡。閒過鄧郁家。秋衣裁藕葉。午飯糴桃花。懶外雲情愜。閑中日數賒。終須明百六。合兌守黃芽。

白尊師種藥小圃歌

道人攜鋤驚鶴眠。斲破山月山如烟。竹姑含頰朮苗紫。飲有露簇黃精蕊。一段雲根瀉秋髓。珍珠迸入苔紋裏。衰年瘵瘵類孩嬰。採藥從君爲君起。

杏林雙燕圖和謝學士

低縈綠岸細穿花。風捲珠簾一桁斜。爲語玉堂雙燕子。銜泥休傍別人家。

始葺西齋

荒園雖積翳。窄窄我心忼。芟斫功方借。芬敷景卽添。碧鮮竿倚石。紅疊果垂簷。語燕頻來到。噴垂一桁簾。

懷員外別墅

好是懷員外。爲園小徑通。山從謝居擬。池看習家同。魚聚都歸寨。鵬馴不置籠。重來鹿皮具。爲報欲稱翁。嘉慶十三年。叨忝入翰林。暨散館。授職者二十九人。一紀未逾。八人卽世。觸事感懷。嗚咽無已。成絕。



句八首分輓之。亦古人長歌當哭之意也。

賦得黃花若散金。玉樓天半望沈沈。夜來誰作秋墳唱。羅刹江頭恨共深。會稽張編修葆。

深秋只記分張日。絡緯添愁菊墮籬。百軸新詩藏得否。扶牀含淚有文姬。海昌陳編修傳經。

每披新事助文華。架有奇書坐客夸。塵夢暫醒雲過眼。一編龍舉屬誰家。國縣王檢討道行。

昏昏沈麴放春眠。冷落車斜二十篇。淚盡一聲金捍撥。蕤賓散水聽年年。武進劉編修嗣綰。有箏船詞行世。

姓名空自署丹臺。偃骨纔披急化灰。至竟成仙須學佛。四禪天上少三災。德編修綯春。江西新城人。

風疾奄奄伏枕身。門前收債雁行人。紅綃一裹勞君寄。療病何嘗肯療貧。貴陽夏侍御國培。

儻海帆高壓浪低。薊門山折馬頻嘶。若爲更化單飛鶴。霧毒鳶沈下五谿。臨桂朱編修榮。出守瓊州。再遷爲

濟河道。

南鄰舊是吾吟伴。寸步毋教走覓妨。臥柳一枝啼不住。春來懶過斛斯莊。定遠宮侍讀煥。

朱八兄新居成

買得疏蕪地。栖遲卽是家。庭移都尉棘。圃熟相公瓜。印古藏書在。田豐舊石夸。明朝誰贈鶴。口數又新加。

車行苦澀。偶以六韻詠之。

北郭罷閑行。旁人羨耳生。輪隨心境轉。窗隔眼波明。下澤真宜我。偏轅且讓卿。蹴塵紅軟起。衝淖黑甜驚。尋壑經邱趣。熏衣刺面情。膩顏容一著。休笑逐康成。

揚州張老人彈琵琶歌

張老人。琵琶在抱。行逡巡。不彈新調。彈舊調。善才黑黑。皆其倫。張老人。欲爲人彈。先制淚。當時不賞。康崑崙。頭白誰憐。賀懷智。張老人。莫自歎。邈迤。且希爲我成一曲。請會密友。召嘉賓。張老人。可憐能抱撮。用手有意無意間。先作遲挑。後急抹。子絃清角羽。初起浮彈輕。盧家雙燕。妨春睡。章曲千花。弄曉晴。商絃厲故人。欲別愁霈袂。蜚吟夕巷咽。還高雁。落秋江。浩無際。緩彈悽以歎。孔雀東南飛。母當別兒去。婦歎會夫希。寒宵悄聞通德語。淚雨紅溼秋娘衣。駛彈聽更好。秋八九月涼生早。山頭牆壞星點烽。樓外笳悲風折草。穹廬蓋野解律唱。玉門投筆班超老。奄忽滅沒聲似無。妖入鍼孔防其逋。洋洋改調發奇弄。絲管啞啞市一闕。將還復往那可尋。漁人舟去聞擊音。欲落又起弦絕緊。華岳天清一霜隼。大水霹靂來交并。石墮山頭泉墮坑。煞尾劃作斷機勢。庭樹葉下秋飈生。巴歌肯前惟閉目。短簫長笛休輕瀆。捋鬚漫撫桓伊箏。祖道須憎漸離筑。固知此技將入神。胡獨不遇常遭噴。晚歸塵土滿頭項。兒叫索飯家苦貧。得毋名高鬼所忌。故使坎壤纏其身。君不見曹將軍。君不見張老人。

程芝雲贈墨

陽曲之祖今無匹。二李膠法茫然失。方羅新製將毋同。近代又推曹素功。黃頭奴子貽烏玉。巨陵丹砂萬杵足。輕瀉微吐筆生花。澹入鴉山暈微綠。紅絲小瓦新滌除。薔薇注水滴靈驗。榴漿蒲鮮清齋罷。乞寫生平未見書。

康烈婦辭十一解

宿遷康氏女。許字蔡。將嫁而夫死。女遂自縊。女少孤。兄弟六人出貿易。獨女與母居。死時年二十

一遺弟書略云。我義當死。所難捨者。媽媽也。媽媽或以我死。而積痛成病。則我目不瞑。弟切須寬慰一切。侍奉尤宜加意。愛敬兄嫂。則媽媽之心亦放寬矣。方言謂母爲媽媽也。几上置藥方數紙。皆母所常服者。乾隆十九年十二月事。以其兄弟市井事終不得達於有司。聊爲作詩。以俟有表章之者爾。

生爲女。死爲婦。生難負吾夫。死恐傷吾母。一解夜起步庭隅。踟蹰復踟蹰。何用作踟蹰。夫死當從夫。二解

仰頭念阿母。淚注天河水。生離意慘傷。何況今朝死。三解死矣勿復言。母病須扶將。留書與小弟。書有十

餘行。四解上言善視母。母老得倚賴。下言母服藥。藥方數紙在。五解墨慘無晶光。綠閃燈燄昏。剜心瀝十

指。縷縷鮮血痕。六解血痕著紙上。是淚不是血。血枯面帛裂。女命今決絕。七解決絕付絲繩。四體直且康。

廊虛自招風。颯颯吹衣裳。八解母聞惻肝腸。弟爲長歎息。萬古泉下心。含悲更何極。九解我欲詳此事。事

遠人不知。聊爲采風者。歌此烈婦辭。十解烈婦宿遷人。姓康年廿一。女也而婦死。乾隆歲甲戌。十一解

故臺灣理番同知朱公輓歌公名慧昌。死陳爛頭之難。

慘慘生人面。俄成厲鬼形。公晚坐齋閣。其僮見爲朱髮藍面人。驚欲死。是夕授命。勢孤增敢決。憤積見英靈。箚

黑魂棲苦楓。丹血染腥昭。忠如續錄。屑涕灑南溟。

故鎮守温州總兵官胡公歌輓。公名振聲。征海賊蔡牽。軍敗被執。死之。

洪濤極萬里。號令一軍征。快掃含沙蜋。頑遭跋浪鯨。鞞刀寒有氣。舵鼓死無聲。殺賊來生志。皇穹鑒此誠。

剽銳荆揚士。行裝聽指揮。潮撞一聲墮。風急萬燐飛。發拍餘威在。投鞭素願違。流年歎新息。未得裹屍歸。

送恩侍郎銘赴古城

一去天山下。無山只見沙。雲紅流馬汗。霜白凍駝花。課麥屯丁慣。吟詩謫吏夸。應輕班定遠。嵬嵬老思家。昨非

竟比治生亟。能無措意偏。舊吟經月改。殘夢入秋圓。巧構蝸爲舍。閒乘馬似船。昨非今未是。更與證初禪。

題友人藏錢詹事大昕與人論經義手札

家巷栖遲日。誼經往復勤。今書稱女子。古易重將軍。愛護期舒被。緘題囑護芸。鄭公鄉儻置。畢願寫遺文。

詠月

今夕長安月。相逢似故人。涼依冰簟取。色驗紵衣親。叫笛雲橫玉。翻荷露瀉銀。猶思川路外。千里闕音塵。

贈粟上人

藏墨稱道具。攻詩爲佛事。時於非想天。乞此無生地。爲笑布金者。營營失了義。

獨至善果寺不逢一僧偶題

庭空無蟬聲。往往蟬落蛻。山僧乞飯去。獨與寒林對。坐久如相忘。斜陽寺門外。

初秋對月有懷

分手成乖闊。縈懷望阻修。荅風稍換暑。蘿月易迎秋。素浪鱗鱗委。斜輝漠漠收。從來詩酒興。拚欲負南樓。

西齋雜興五首

丈室似招提。簷虛却愛低。檢書遲入架。得句速拈題。蒲薦偷閒坐。松爐趁暖泥。定中香一炷。有累笑周妻。

世味嘗都遍。偏於病味諳。塵封裴氏學。冰噤邳公談。倚枕休驚蟻。充庖并斷蚶。一杯山朮苦。引滿爲除痰。縱有朱提在。誰能買夏涼。箒閒風掃石。棋靜雨敲牀。映肉蕉紗紫。冰牙杏酪香。木皮誰寄與。懶試葛洪方。爲多瓜蒜友。小圃築牆西。夕照紅滿架。西風荒一畦。人情松肉脯。秋思菊苗齏。斟酌雙鴉背。來春乞自攜。莫信閒無事。閒中事每添。茗材評紫筍。藥味訂青黏。觀物頻推理。疑書屢下籤。將來比朱異。猶勝老夫廉。

哭謝侍講同年

一官君甚戀。戀卽爲家貧。可歎新除日。惟爲片刻人。君以補官日卒。將分襟漬血。未撤瑟凝塵。誰任奔喪事。功曹是病身。林長君十五年。且多病。嘗謂君他日當志吾墓。回思戲語。是用愴然。

荒率碧山居。宵焚學士魚。但期文足用。莫問廩無儲。楹鑿嬰留語。君著約書已成草。篇分陸奏書。君上書言事凡萬餘言。所忠他日到。著述問何如。

探君懷抱事。脆促付長吁。膝上心依述。城南詠示符。箸深雲架嶺。竹苦水還郛。千里魂來往。難招信楚巫。知好今將絕。山河邈望時。墨殘秋水注。石斷永興碑。臨壑傷情遠。攀林隕淚滋。三泉穴無際。蟻漏畢交期。晚入廣慧寺。觀石上人。晚課誦拜精苦。因有題。

嚼湯振金杵。梵咒聽誦誦。行爲傳人密。功因勝敵嚴。莖荒烟臥菊。影直月移杉。爲報西方彥。凡心足了凡。祕院水亭夜。景有寄。

玉蕊涼銷水檻塵。頗黎瑩膽露含津。欲書天上佳風月。緘入相思報許詢。

金農漁隱圖

樵青勸我買漁磯。揀贈銀鱗一斗肥。流水桃花都不欠。爲言須辦綠囊衣。

去年哭宮侍讀煥。今年謝學士階樹繼逝。皆密友也。雨窗孤坐。吟抱增淒。口念二十八字以志哀輓。

道光五年乙酉九月十九日。

袞袞浮名波畫字。沈沈冥路玉銷烟。李三席八今何在。風雨重陽黯一年。

### 送友之閩

他鄉送君去。宜作故鄉看。紫荔聞蟬摘。閩中諺云。秋蟬叫荔支紅。紅葢漬蜜餐。瘴消醫局少。年富米升寬。若見歐陽子。論詩亦未難。

### 送宋大兄

吾傷宋夫子。秋賦未成名。書爲窮難著。裘因敝轉輕。激揚思嫁衛。契託惜班荆。知有前期在。將軍屣屣迎。

叔美書來勤詢近狀。兼勸南歸。以詩答之。不自知其辭之蔓也。

仲公知我病。書來爲我惻。既老病固宜。頽然方自得。禮譽息來往。幾闕疏文墨。獨恨蒲柳姿。先零負生植。錢從戶曹受。米自太倉求。素餐豈不愧。舍此無他籌。頽齡供給易。良朋情誼周。蹉跎問時節。春及又成秋。知進不知退。哲人儻見責。下筆何慙慙。含情惟脈脈。遲營下濮田。恠買南岡宅。非是不歸來。歸來翻似客。

### 詠微雪

六出認難真。珠輕擲瓦頻。不教池有跡。都覺被如春。鑪炷銷冰繭。窗枝鬪玉鱗。茅柴晚炊火。還念忍寒人。

### 詠折枝梅花

海南佳人睡初起。微睇珊瑚腮暈紅。却似玉梅花驪影。半開斜倚錦熏籠。

# 玉山草堂續集第五

六喜三福齋吟藁丙戌

正月十一日雪

綺綴鸞烟匝。珞岑鶴雪融。饒香分剪綵。訝暖入吹笛。絮誤吟邊豔。梅添畫裏紅。氤氳識天意。還想萬方同。

瀛洲亭雪景

邀馥歸花盞。欺埃墮舞茵。誰知抽祕客。偏擅蕊珠春。

二月四日出郭送客回。因訪天甯寺寬上人房。不得至。散步遣興有詠。

相訪不相期。暄寒候恰宜。官橋溪練練。佛日雨絲絲。緩入鸞移樹。閒尋蝶過籬。還人春倍好。莫恨訪春遲。

江孝廉爾維以詩一卷枉示

敘事次山約得名。梁子顛我方傾大雅。君足邁先賢。圓借珠排字。清如雪命篇。還期得標準。詩細示何年。

吞苦杏篇爲范氏二烈婦作

乾隆中會寧縣范氏女。嫁爲諸生張世甲妻。哭其夫。斷食吞苦杏而絕。後世甲兄世弼死。妻和氏亦吞苦杏殉之。因賦此篇。

杏花開。婦在家。杏結子。吞杏死。花再開。煎我懷。死者安所之。生者心悲摧。生者勿用悲摧。枝上結子何纍纍。寄言地下死者。攜手便與同歸。



贖雞行贈朱八兄

朱老愛雞如愛子。杖頭掛錢晚入市。磨刀霍霍誰殺雞。雞狂亂走雞聲死。呼兒捐錢贖之去。免汝以肉歸砧几。忽生忽死雞不知。朱老怡怡自歡喜。但願人皆似朱老。物命之全信多矣。按膺庇鴿應同此。捨身投虎亦足擬。膜拜請佛申其旨。佛坐蒲團懶不起。

客贈藤根如意

斫取藤根付據觚。蠟光揩後細枝枯。將來爲問明僧紹。得勝金蟬玉柄無。

題喬重禧吟卷後

一壺雙笈費周旋。櫟塢茶山醉卽眠。夢到竹西歌吹地。不禁腸斷杜樊川。

百回口念君平句。弟子重逢綴韻諳。君爲碧城仙館詩。弟子陳大令有碧城仙館集。正是落花時節到。樓臺金

粉憶江南。

興成寺看花感鮑詹事桂星

花枝照眼簾垂處。曾見知章井底眠。今日鬢絲增幾縷。落紅如雨梵幢邊。追歡懶逐綺羅遊。閒倚城南小寺樓。橫笛一聲雙淚迸。淒涼詞翰憶昭州。

雨來

雨來如過客。半月未嫌疎。未到聲傾處。將繁點迸初。林芳新暎蕊。壤滑嫩澆蔬。誰寫春山綠。溪橋把一鋤。

同人汎舟大通橋作

半里芳陰水郭西。平橋不礙野航低。爲逢山雨詩頻屬。欲訪溪花路卽迷。撲浪春鉏飛兩兩。縈沙舊竊翦萋萋。杭州舊事偏堪憶。醉賞烟波過白隄。

吳同年嵩梁以再生草見示。題卷後卽呈吳同年。

但是詩人安得死。病差數卷詩成矣。鬼神垂棄三尸捐。嘔出心肝苦如此。莫言地下堪埋爨。且向人間乞唱酬。一笑慕誇身手健。斷墜荒墳夢并州。有夢行并州道上作。

送李大令赴關中

看君秦地去。旣嘆值華年。毗庶關情切。登臨發興偏。白渠經渭折。黃巷入關連。新作無勞寄。班生賦競傳。采葵菜供午食。因以爲詠。

晨興至松下。小摘伴炊秬。色借波稜翠。香添石髮清。調和資食譜。淡泊見人情。爲語何曾輩。伊蒲了此生。爲誠贊善題姜白石先生紗巾羽扇小像

茸帽金鞭不歸去。醉憑鞍馬琢春詞。如今閒坐花藤榻。五月南風捉扇時。春衫細翦水波柔。戴笠詩仙擬得不。除却綠陰芳草外。此生何處乞菟裘。

夜夢惠兒旣覺。忍痛成此。六月二十七日。

汝魂住何處。今日方見汝。似恐傷爺心。相逢無一語。縱使向爺語。煎心語甚難。聊同寄書客。空紙報平安。

遣日

日復何須遣。聊云遣不難。口毋爭喋喋。心且任漫漫。詩俗求僧改。棋生怕鶴看。過牆有新筍。屢乞問平安。

司氏小園晚坐

月出不在地。西軒生夕涼。獨吟蟲可愛。偶坐客相忘。荷葉忽成響。薜花時送香。泠泠欣有會。何處淨琴張。

題朝鮮巾緯侍郎懷人詩後

黃丞黃景仁仲則。落落吾知己。展卷甘亭鎮。彭兆孫。意亦親。卅載風流今頓盡。海東歎息有斯人。

新羅一釀細傾時。秋入疎林奈蒂知。願得放將吟夢去。碧蘆舫畔趁題詩。侍郎詩齋名碧蘆舫。

題金陵女子畫秋荷感亡女墨卿詩卿

芙蓉不肯耐輕寒。粉壁香銷挹露看。偏是鶯鶯知信早。西風一夜到長干。

張憶娘簪花圖爲朱八兄題。楊晉畫。

掠削雲鬟巧樣粧。柳花裏子白衣裳。惱人春色渾無賴。親見當年段七娘。

慳施黛綠點珠丹。寫出嬌顰墨未乾。從此金錢休浪使。淡粧西子恁君看。

雨聲如酒滴春槽。醉眼變於小樣刀。曾見牡丹鞦韆未。背人無語摘櫻桃。

輕垂銀蔓薄籠紗。香簇花鬢綴鬢斜。鏡裏只嫌花不稱。可知傾國是名花。

費盡機雲墨幾螺。爲渠愁態送嘲多。紅牙紫玉休輕唱。此是開元舊法歌。題詩者。姜琛給諫以下。皆國初諸

老也。

沈沈犀帖釘窗油。扇掩輕羅月魄羞。只有江東楊子鶴。細含烟汁對梳頭。

彈指雲英已嫁身。年華筍柱踏生塵。不堪紅粉成灰後。零落貞元幾輩人。續題詩者。沈德潛尚書。曹仁虎庶子以下凡數十家。今無存者矣。

花飛容易觸禪心。萎碧殘紅蝶颺禁。欲賦閑情傷老大。搔頭渾欲不勝簪。

聞煎茶聲偶得四韻

無風風不別。暗入竹窗尋。率爾盈清聽。悠然愜素襟。催瀉春午枕。借雨曳秋琴。接續疎枝外。殘蟬細細吟。

得馮同年清聘書。憶曾稽景物。卽以爲詠。

昔年釀川上。小住得移時。乘興友逢戴。劇談僧姓支。風林秋覓句。月舫夜邀棋。景好今朝憶。瓢壺惹夢思。

題畫五首

舟隱

竹籬門外繫船樁。鱗織青篷小眼窗。好是東塗西抹罷。一竿烟月買桐江。

佛印燒豬

花豬味美閤黎設。甜味如錫軟膠牙。多少吳兒寒乞相。葷羹鹽豉浪相夸。

紅橋月泛

簫聲幽似未迴夢。花影沸於初上潮。評取揚州二分月。一分無賴是紅橋。

灌花

花新下子子生纔。鹿眼編成抱甕來。阿段也能知我意。爲分餘潤到蒼苔。

日觀晴雲

雲生氣連空翠長。百里東去凌滄茫。人間只作無心看。直捺潮頭捧太陽。

每無事日五更卽起。客有以睡味相夸者。作此答之。

五更最是多清味。起擁重棉撥地鋪。明月肯先佳友到。梅花夢裏得知無。篝燈信手取書看。粥軟如酥恣意餐。無事便容成一飽。人生端合作朝官。

歲晚史館支月給到偶賦

分支月廩及今朝。名是儒官實濫邀。性簡并教書可廢。銜清不信祿偏饒。文章定論慙知己。衣食多須託聖朝。虛說報恩仍自媿。鏡中留影髮蕭蕭。

林三兄贈柑子口占爲謝

一筒遠贈泥山產。醋齒偏教鄧橘羞。銀甲香添人醉醒。乍寒天氣說溫州。

橘枝詞

枝枝葉葉冷金攢。試摘清芬貯玉盤。橘正酸時郎始別。今朝食橘憶郎寒。紅羅刺骨瑩含漿。面皺勻添碾麝香。若使踰淮曾化枳。年年爭奈洞庭霜。

斷詩

食息今朝心地寬。斷詩方悟作詩難。三生慧業千秋事。例作楊枝駱馬看。

# 玉山草堂續集第六

夢蟬亭剩語

廢園小舍中有盆梅開數花

向陽茅屋三間在。瓦斗春芳迴絕羣。却似豐州新歲裏。雪凝瓊貌見昭君。

詠瓶中梅花

玉斧夜斫秋雲根。一枝兩枝枯蘚痕。孤負空山初夢醒。月明殘雪酒香村。

客自閩中歸。盛談閩中山水方物。閩爲林少時游釣地也。偶有所觸。系以四韻。

少小嬉遊處。城南景最賒。箬深灘忽雨。楓遠岸常霞。凝碧飭絲薦。炊香米糲夸。因君勤倚撫。相憶便如家。

城西廢寺

一逕通幽處。遲遲出綠苔。偶然隨鳥至。不爲訪僧來。幢字成雍刻。經函舍衛開。門前松已老。未許問誰栽。

偶成

官職非云劇。偏如劇不支。一春常抱病。終日罷吟詩。階藥堪鋤候。庭莎漸積時。從來寫懷抱。并少故人知。

偕同人看花

三宮廟僻人不來。粉梅檀杏參差開。海棠一株更傾國。冷伴簫聲作寒食。昨日天雨今朝晴。蜜蜂蝴蝶飛入城。城中花比城外好。只怕顛狂被花惱。朱樓十二閉沈沈。滿地綠雲閒不掃。買春誰肯待招呼。蓮酒船

來興不孤。廿載看花成一例。爛遊我只憶西湖。

題楊文憲圖像爲朱八兄作

一自從軍去。回思對策時。君恩老金齒。鄉信斷瓊枝。命舛三星賦。形銷九辨悲。千秋儒雅在。談藝是吾師。

三絕句

三月三日天氣好。舍北舍南春水多。笑問于公能畫否。一溪柔碧泛紅鵝。  
昏昏長日眼慵開。滿逕春陰護碧苔。却羨風流陳閣老。小車衝盞看花回。  
韋杜城南尺五邊。遊絲撩亂薦春天。不須坐對黃金鴨。風惹梨花一地煙。

朱八兄初成小閣

幽意一云愜。塵勞可奈何。暫憑舒眼界。久坐息心波。秋與琴相約。山如畫不多。阿戎談亦好。更約步兵過。

坐朱八兄小閣

絲絲窗外梅黃雨。朵朵溪南豆綠山。荔殼松毬燒正好。又分詩境到柴關。

移居石虎吾同。汛埽小齋。卽事有興。

偶然成三遷。不礙徒四壁。酒與公榮飲。梅同朱老喫。

題趙嘏渭南集

絕唱新傳倚樓句。南朝彩筆復徐拈。誰分千板桃花紙。爲寫當年昔昔鹽。嘏常取薛道衡昔昔鹽詩。逐句爲題。以五言詠之。甚工。

題顧瑛玉山璞藁

楊家樂府有新聲。風調都輸顧阿瑛。吟遍玉山腸斷句。翠屏微雨小寒生。

題青邱集

七子才高氣復逾。亂頭粗服愛青邱。過江若要論人物。讓取吳儂第一流。

梅花

爛銀盃凍瓊酥酒。簾下翠禽飛寂寂。美人欲賞來未來。明日江樓罷吹笛。

瑛寶春山採藥圖

龐公采藥未曾還。時有人來爲掩關。盡日小窗聞雨到。朮花松子遍春山。

瑛寶春山訪友圖

沙淨無泥雪半消。又尋仙跡度溪橋。苔煙屈曲迷無路。處處香生萼撥苗。






右玉山草堂詩三十卷。錢唐錢學士師撰。學士爲道光二年喜孫薦卷房師。是年七應禮部試矣。自是每見必譚經義。學士熟于漢唐注疏。近時經生家言。於本朝名臣言行及河漕鹽權倉儲平糶海運采買賑銅政錢法地丁雜稅諸大端。人地年月多得之史館記載。學士臨終。以平生所集名臣儒林文苑事實凡九冊。命喜孫藏。學士于史記誦尤博。嘗論遼金元兵制。足補史志之缺。幼以文學知名。遊於四方。官學京師。從故老習聞掌故。從其父方伯君任所專司錢穀于藩庫。度支出入之節。若詠諸掌。以翰林起家。大考一等。歷官學士。典試廣東四川。爲鄉會試同考官。充國史館總纂。人見其爲文學侍從。遂以文人口之。生平無官守言責。經世之學。不爲世用。與人言亦罕及之。嘗爲人策采買倉儲。見諸施行。世亦莫知其出於學士也。喜孫官戶部。始論河務。復管關權。嘗問故奏於學士。坐輒移時。學士病不能支。或倚徙以譚。不令謝去。十年如一日也。學士旣以紀事九冊貽喜孫。以詩三百篇貽高麗申侍郎。復以寫定詩三十卷。貽程祭酒恩澤。祭酒以副示喜孫。因誌於後。

道光九年六月七日門人汪喜孫跋



右玉山草堂詩續集五卷。國朝錢林撰。案先生字東生，一字金粟，浙江仁和人。嘉慶戊辰進士，官至翰林院侍讀學士。丙子秋，會典試粵東，先從兄梅村孝廉獲雋，故余亦稱門下士云。先生未第時，陳荔峯少宰督學粵東，曾邀同署中校文，故嘗謂與粵東人特深文字緣也。余計偕入都，先生已歸道山，聞以遺著付程春海侍郎，欲索付梓人，乃未幾而侍郎亦歸道山，後嗣凋零，叢稿散佚，安玩堂與直園藏書，均不可問。況先生遺集哉。南歸後數年，徐鐵孫太守以先生刻成詩郵寄玉生廣文，凡十二卷，其嗣君跋云：止於甲戌乙亥之交，太守亦先生典試粵東時所得士也。又越數年，太守復以先生未刻詩郵寄廣文，凡五卷，始丙子以迄丙戌，先生之詩殆全矣。末有汪君孟慈跋，稱先生詩二十卷，而未刻五卷，則署第二十六至三十已刻十二卷，其卽二十五卷，而錯綜排次之者歟。先生資稟獨高，而根柢深，所爲詩絕不屑寄人籬下，視沿西泠流派者，岸然如鶴立雞羣，殆以曹、鮑、庾之風骨而降就高岑、王、李之法度，故韻流於三唐，而醞釀實深於漢魏六朝。與侍郎詩異曲同工，洵推近代詞人之冠。清剛雋上，富豔難蹤，不意十餘年間，連喪兩導師，宗風幾墜，惜哉。廣文以相示，特另編其未刻者，曰續集，以付梓人，仍附錄孟慈跋焉。其已刻者無庸贅已。道光己酉，展重陽日，南海伍崇曜跋。





紅蕙山房吟藁

袁廷禱撰

紅蕙山房吟藥

本館據知不足齋  
叢書本排印初編  
各叢書僅有此本

# 袁壽階先生傳

嘉興丁子復撰

吳門袁君壽階。以爲古人之學聞。及訪前卒。見其壻貝君壻。袁君而不可作。得交貝君。此行爲不虛。既出示所作袁君行略。信有以異於今也。君諱廷壽。初名廷樞。字又愷。又字壽階。國學生。世爲吳縣著姓。其先有兄弟六人。以文行顯。與四皇甫齊名。湯文正公斌撫江蘇。建六俊祠以祀。父永涵。候選知州。二子君側室韓孺人出。六歲而孤。母教必跪而聽受。韓孺人不下樓十五年而卒。君號絕久之。每哭。血淚俱下。繪竹柏樓圖。徵海內詩文。以顯其節。大吏爲請旌。孺人乃不死。事兄廷樞。謹兄卒。撫姪如子。家饒於貲。置不省。不事制舉業。遺書萬卷。點勘考索不少休。聞有善本。必得乃快。其時錢詹事大昕。王侍郎昶。光祿鳴盛。江徵士聲。段大令玉裁。諸公。以耆德碩學。研經考史。各發明成不朽業。君上下議論。具有根據。諸公折節訂忘年交。與周明經錫瓚。黃主事丕烈。顧明經之遠。號藏書四友。主事多宋槧本。往復商榷。尤契合。交遊中有一善。稱不去口。過必諱。以急告立應。家乃中落。袁氏自六俊後多傳人。譜系闕略。乃網羅舊聞。成吳門譜。搜先代遺文。墜簡積數巨冊。得遺硯五。其一清容居士硯。王侍郎所贈。奚布衣岡作歸硯圖。士林豔稱之。以五硯名其書樓。歲終陳硯。設酒脯以祭。作祭硯文。勗其子。樓中藏弄先澤。兼歷代知名人書畫古碑古器。一時名公投贈尺題畢備。客至登樓論說經典同異。旁及家世文獻。娓娓無倦色。而生計益絀。應侍



郎阮公元。運使曾公煥。招修揚州圖經。同事震其名。既乃歎曰。今黃叔度也。後遊武林。得疾歸。卒年四十八。子二。兆壘早卒。兆麿娶黃主事女。主事教使成立。著有紅蕙山房集。五硯樓書目。金石書畫所見記。漁隱錄。諸書。壩次第劖劖。壩固傳君之學者也。有以君不事生產而訾議者。君不屑也。今人之不古。苦坐不耐窮耳。且袁氏在明正嘉之世。迄今三百餘年。得君而世德益顯。彼蓄聚以交付其子若孫。能如是之久。且遠乎。余故徇壩請。敍君生平。使人知今未嘗無古所爲也。

# 紅蕙山房吟藁

清 吳縣袁廷樞又愷撰

丁巳夏日移居西塘漁隱小圃偶成七律四首

路轉楓橋有敝廬。竹林好臥復移居。與舍姪同居常依喬木思餘蔭。藉寄閒身讀古書。開徑還宜栽杞菊。結鄰

只合伴樵漁。卻離闌闌鷺塵斷。門外惟停長者車。

童非曾於此釣遊。手栽梅樹已成蚪。將驚雪色侵華鬢。忍使光陰付逝流。白石清泉非樂志。寒楓老桂易

悲秋。徘徊最是傷心處。午夜青鐙竹柏樓。

五硯樓頭日再登。藏書萬卷盡籤籀。窗中遠岫青連幌。檻外新禾翠滿塍。夜半鐘聲來月榭。江千人語雜

漁燈。林塘日涉生幽興。漫詠田園几獨凭。

當年摩詰此棲遲。壁上刊留絕妙詞。北海琴尊誰繼美。衡山圖畫尙遺思。圖爲王文盤溪故居。王文工畫。師法文待詔。沈歸愚先生題曰。

小停雲館。壁有四塘雅集詩。先兄爲之刻石。同袍不少羊求侶。閉戶惟將許鄭師。夙夜果能通一藝。傳家亦可愜心期。

仲冬九日鈕非石招游洞庭兩山夜渡太湖

莫釐縹緲望中收。明日登臨到上頭。山在湖心連夜渡。波平舟似泛輕鷗。

偕鈕非石周懶漁遊東山翠峯寺次懶漁韻

山抱招提古。人行積翠中。寒雲低欲雪。幽壑暮生風。題壁推邦彥。安禪憶不空。上方望湖渚。漁火影微濛。

十三日夜與金岑齋鈕非石錢廖田周懶漁瞿安艤同游林屋洞

林屋洞天標第九。我欲往遊結想久。昨日偶歌靈寶謠。夜來一夢超巨藪。恍扣仙關謁仙子。貽我素書字。蠅斗開函欲讀未能識。晨鷄驚枕日透牖。夢游未竟與便豪。擊楫渡湖月出高。水浸山根洞在腹。遙望巖然如復陶。同志探奇有六人。短衣執火那憚勞。洞門向上人向下。俯行地底心忉忉。初入僂僂背摩石。漸行軒豁生虛白。石鐘石鼓考有聲。玉柱金庭傳自昔。何以巨靈劈此境。不使天光漏一隙。如珠乃曲身蟻穿。百折千盤破山腋。欲窮禹穴迷西東。約略隔几不可通。想是靈威盜書後。神人赫怒封其宮。我雖愛書不盜書。神乎許我遊其中。大呼不應熱龍驚。飛來蝙蝠形如鴻。急扶向路魚貫出。洞口看山若有失。回憶隔宵夢境奇。豈是山靈誘我爲新詩。

侍錢少詹游林屋信宿靈祐觀賦呈二律

神宇依僊境。來遊冬日晴。荒園留宋牒。舊額尙唐名。湖闊波光迴。山靈雲氣清。坐餘塵慮淨。天籟竹間生。問字隨函丈。精廬信宿居。方言徵記載。雜詠寫樵漁。掃壁親題字。尋碑數駐車。當年李無礙。住此樂何如。

宿靈祐觀和廖田見贈之作

仲文吟秀句。落月冷空庭。一曲山中奏。數峯湖上青。得碑求火讀。疑雨立階聽。洞口雲來往。僂關夜不扃。

雨後游包山寺

路轉峰迴古寺蹲。蒼松夾路到山門。寒鐘一杵雲開嶂。翠竹千竿雨住痕。圖壁化人尊法相。舊言怪事笑仙婚。石幢細讀唐時刻。僻峙湖心今尙存。

### 登石公山

包山兩奇境。對峙如爭雄。林屋踞山西。石公躡山東。左右屹相向。萬頃波濤中。彼以洞靈秀。此則巖玲瓏。玲瓏森玉骨。林立眩雙瞳。盤旋逸巖走。紆迴一徑通。歸雲洞在巔。幻態顯化工。勢如雨乍歇。奇峯斂蒼穹。光如月在裏。明鏡含朦朧。雖不逢神女。身到巫山同。緬懷良嶽內。鑿取何無窮。蓬瀛果在望。蠹賊已內訌。所以無逸篇。賢君畫屏風。欲尋朱勳勅。峭壁苔蘚蒙。獨有一片石。形似披裘翁。乃祖昔封侯。此翁今呼公。呼公與呼侯。頑石兩耳聾。因之感歎久。舒嘯凌長空。

### 咏太湖石

太湖山石自玲瓏。非爲波濤激射空。看徧石公山上石。始知天巧勝龍工。

### 錢少詹書林屋題名刻陽谷洞石壁

春宮亞相好金石。爲訪琳琅探古蹟。林屋山頭文字多。不憚嵯峨行逕窄。蘚蝕苔封讀婁譌。剔洗詳審親摩挲。洞口突兀見標榜。山中宰相手劈窠。洞口刻天下第九洞天。六字爲王文恪公辭。昔我先人亦游此。陶齋胥臺列名氏。不書年月書同游。集中有記詳其事。叶嘉靖紀元歲庚寅夏五六月是上旬二百六十有八載。及余孫子賸貞珉遊題名。未識年月。檢永之文集有遊記詳其時。今亦題名到巖際。中郎八分精波勢。撰杖來游得附

尾大書深刻期不敵。拓歸一紙壁閒安。對之身若居林樾。人生流澤有時斬。惟此長留後世看。

懶漁同游西山回過其綠楊灣山居同非石留寂南澗草堂

共返西山棹。來登玉笏峰。草堂瞰震澤。書卷蘊心胸。舊雨聯床臥。新知傾蓋逢。羨君消夏好。繞屋種芙蓉。

和安棧東山返棹留別之作

山水多情能引興。歸來每自比人遲。勾留此地因僊宅。贏得清詞綴色絲。十里芙蓉終夏日。千巖晴雪早春時。結廬果愜同心願。好挈奚奴橐筆隨。

游卯塢紫金庵庵有唐人塑十八應真像及老僧手植玉蘭更訪興福寺唯頽垣破礎而已與非石

同賦

攬勝不窮幽。大烹嘗一樹。卯塢有蘭若。境僻游人鮮。早起理輕楫。帆隨風勢轉。林深路鬱紆。松柏鬢苔蘚。眞字頗清曠。法象果精選。傳出楊惠之。惜無古刻辯。卻與會昌幃。兩山數爲典。禪房玉蘭樹。妖嬌如蠅蛭。老僧云手植。題唱始通顯。此遊多索隱。餘興恣遊行。更尋興福寺。殿廡已經燹。感茲盛衰理。深爲佛子覲。歸來意味闌。漸覺足生繭。

非石偕遊東西兩洞庭宿其齋中七日而歸賦贈四十韻

結交已十載。未上君子堂。今茲遊山來。相將一葦杭。渡湖夜方半。煙波似瀟湘。漸聞犬吠聲。月冷山蒼蒼。登岸就前途。坦夷如康莊。恍如桃花源。桑麻夾路旁。路旁見村落。精舍依平岡。庭中垂橘柚。案上列鉛黃。

升堂拜阿母。頃刻羅酒漿。令弟敬愛客。深杯樂未央。隔山有佳士。謂周邀取同翱翔。越日集簪裾。羣從包山陽。林屋探禹穴。石公走練塘。鑿壁題名歸。挂帆趨風強。多君興更豪。酤酒割肥羊。諸公皆返棹。獨我仍聯牀。登臨未盡勝。要挾名山藏。朔風一夜吹。雪落何飄颻。萬樹瓊花開。千岳雲錦章。躡屐遠眺覽。銀海生精光。卽此已大觀。奇景豫難量。莫釐有荒塚。麻姑存仙鄉。古迹必共探。俊味還許嘗。野鴨及菱雞。真柑雜蜜囊。銀刀作繪細。長腰炊飯香。更有洞庭春。一飲累十觴。飲酣學咏詩。索句搜枯腸。深羨凌雲筆。敏捷如機張。脫口數萬言。雅音追三唐。高峰七十二。峯崿挺璋璋。人文風物美。示我有周行。因之想結廬。衡宇當相望。晨夕好過從。湖山同徜徉。情深意綢繆。欲別心迴遑。山中已七日。言歸理輕裝。攜手復同船。人笑奔波忙。宛如蛩與蟹。出入須扶將。又如鵲鴿鳥。飛鳴必頡頏。緬懷皮與陸。唱和比笙簧。今成四百字。聊咏清風長。

懶漁乞高燕亭晝夜游林屋圖寄予賦謝

美成詞筆房山畫。寫得同探禹穴圖。一幅寄來情爾雅。數回展讀思縈紆。曉陳萊几雲生室。夜對明窗月滿湖。從此臥遊縹緲境。唯嫌洞裏景難摹。

漁隱小圃十六詠

楓江草堂

誅茅楓江上。沿江構草堂。夜鐘出古寺。春水通橫塘。編籬學老圃。不憚灌花忙。

五硯樓

先澤在硯田。經訓是菑畲。灌漑若穎發。筆耕信非虛。開牕面平野。樓中看荷鋤。

吟暉亭

孤亭對初日。幽砌露未晞。離離見寸草。融融樂春暉。低吟東野句。零淚沾裳衣。

夢草軒

一榻近池塘。獨臥布衾底。忽聞魚夜躍。根觸披衣起。年年春草生。謝夢今已矣。

錦繡谷

藏春錦繡谷。春深花始繁。罌粟開且落。芍藥階前翻。誰占十分春。花風廿四番。

銀藤窠

閣邊架小屋。簷繞銀藤枝。暮春花璀璨。宛若珠簾垂。月色相掩映。夜坐吹參差。

水木清華樹

晴光泛秋水。空籟振林木。翠羽集復翔。文魴戲相逐。臨流時抱蘂。得句在延目。

洗硯池

舍後有清池。池清可洗硯。綠縠縐千層。冰輪沈一片。風吹翰墨香。青蓮生水面。

繫舟

不泛五湖裏。惟將書畫裝。虛窗不受暑。止水自生光。堂坳一杯滯。寂寂綠楊傍。

柳泚倚

柳泚水清淺。橫石卽爲倚。樹密鳥聲喧。溪流花影移。前山有佳趣。行歌復霽徒。

小山叢桂館

叢桂發天香。衆芳漸搖落。築館山之幽。高會此酬酢。不慕招隱士。喜得文酒樂。

芙蓉徑

木末萼芙蓉。騷人寄幽思。湘江秋露繁。晚霞映霜翠。今傍野人廬。逸徑增清媚。

挹爽臺

青嶂立如屏。蒼巖淨若埽。雨過清覽觀。雲開盪懷抱。橫琴曲未終。飛鴻入晴昊。

稻香廊

朔風吹寒雪。四野田鋪玉。長廊望農人。白屋飯蒸粟。回憶稻香時。辛苦胼手足。

漢學居

古聖微言絕。漢儒詁訓明。仰止鄭北海。禮堂集其成。我欲捃祕逸。何時慰平生。

紅蕙山房

良友貽紅蕙。山房易嘉名。秋風始吐花。色豔香偏清。蒼松今有伴。發我思古情。蕙爲鈕君非石所贈。庭有四面松。乃小停雲館故物。



鈕君非石以紅蕙同詩見貽適予紈扇製成作詩其上報之卽次原韻

佳卉遠寄將良友情不薄時予試竹爐方汲清泉淪忽聞紅蕙來異香九天落世俗重素蘭名目好穿鑿此獨爛如霞清氣布寥廓高吟白雪篇麗則不繩削匪勉欲繼和腸枯筆屢闕緬懷徐尙書洞庭眈林壑纂修集鴻儒豪素深心託事隔百年餘觸目增蕭索惟存手灌花聞名久驚躍感君貯磁斗持踐季布諾報以白紈扇秋風驅炎鏢自笑河魚疾身似猗蘭弱喜得美人貽霍然竟勿藥急邀所南翁解衣共盤礴

附非石原作

崇蘭被三湘朱萼粲幽薄若茗溯靈根奕奕誰疏淪茲山闢鴻濛幽獨徒寥落施王相繼興謂殿撰宗

之二風氣始開鑿國朝盛文運一統纂閔廓徐君尙書健庭領其總羣賢佐編削時闕君百詩顧君景范胡

同來洞庭山開局觀濤關余外家金氏舊居成書上天府遺澤留雲壑迄今布清芳草木欣有託袁君抱素尙

好古勤探索聞風緬臭味想見情踴躍乞醴予自慚余轉從鄭君棧山索得分致幸符諾是時當炎蒸金石愁銷

鏢置之君子堂豈畏根枝弱目成契美人投贈殊芍藥會須邀同心歡賞恣磅礴

七夕製紅蕙牋筆以報贈詩者得絕句二首

紫莖綠葉豔秋風賺得新詩字字工欲報七襄無雅製還將箋筆貌花紅  
牋勝雲藍染絳霞筆皆彤管自生花分貽藝苑錦機手傳播芳馨也足誇

戊午三月十一日小圃牡丹初放宴集王少司寇昶錢少詹大昕潘農部奕雋蔣司馬業晉段明府

玉裁及同人賞花以是日也。天朗氣清，惠風和暢，分韻予分得天字。

洛陽聞說花爲田，奇花一朵求千錢。姚黃魏紫久不數，紛紛新種名難賤。去年有客中州至，載歸百本裝長船。拔取其尤植小圃，開當春暮初晴天。東風蘊釀逞妖冶，旭日照耀何斑連。相對凭闌動清興，重聯佳會開芳筵。回思金粟燦林谷，又見錦繡堆階前。坐中二老是吾師，後堂高足隨彭宣。謂王介人，徐澹如。羣賢袞袞仰山斗，鄒枚鄭服差齊肩。飛觴不用申酒律，分題自愧無酥煎。吟成秀句奪山綠，醉餘豪氣凌雲煙。花若有知更含笑，枝枝舞弄春風顛。人生快意恣游覽，不然佳日空虛延。波流牆角月漸起，蕩漾花影生淪漣。白髮簪花連袂去，沿塘簾捲看神仙。獨我重傾白玉盞，對花醉倒花前眠。

己未仲冬于亂書中檢得隨園先生手札一紙，書極工整，娟秀可寶愛也。先生不以能書名，然頗有六朝人風度。士大夫爭欲得其名跡，故先生晚年刻一小印曰：子才的筆。凡手書簡翰並用之余所藏。先生尺牘盡是的筆裝成巨冊，今將此札增入并系以詩。

波折天然雅俗分，論書何事太紛紜。撐腸若有五千卷，筆下能生五朵雲。心畫也如面不同，風流文采寓其中。翩翩僂筆無人擬，開卷倉山一老翁。

庚申閏四月既望雨中泛舟至海會庵，贈竹爐於臬堂上人。陸鐵簫繪圖同人賦詩以誌。

編竹製茶爐，惠山仿遺式。此於老衲宜，苦茗佐香積。因偕蓮社人，共詣棲禪宅。微雨路冥濛，濃陰晝沈寂。精廬闢數弓，曾面九年壁。持以作供養，竹徑浮煙碧。相約品茶來，趺坐忘主客。清磬出疎林，蒼然橫暮色。

積善西院古梅

東風拂面破春寒。一樹繁花雨乍乾。獨閉閒房多歲月。誰人先我杖藜看。

題汪子飲泉潮生畫蔬圃秋容紈扇寄貝塔筒香。壻時僑居廣陵江氏康山艸堂。

底須感觸怨秋風。最好秋光村野中。我願飽餐籩豆飯。茅簷看月聽鳴蟲。

江吟香招遊真州諸勝留飲十日臨別賦贈

投轉豪情百尺樓。招來探古浹旬留。連宵縱飲酬明月。傾坐雄譚集勝儔。禮數全刪忘主客。談諧不禁寓陽秋。西谿北郭徐搜討。日日扁舟載酒游。

得交羣紀爲詩篇。今再登堂憶昔年。先德遺圖傳鞞鞞。一家風度盡翩翩。情深昆季敦朋好。馴到奚奴識主賢。多少勾留難遽別。隔江青嶂似相延。

題西子圖

梧桐秋老月如銀。曾照吳宮歌舞人。當日不教逢范蠡。姓名誰說學羅春。

題貝容齋三好圖遺照并序

揚州汪蛟門先生畫三好圖。徵當時名士大夫題詠。卷成牛腰。今吾姻丈貝君容齋亦畫三好圖。徵詩。其名雖襲。其圖有別。蛟門先生乃慕蕭平子之好而爲之者。君則慕飲中仙之好而集其成者。所好有同有不同。而其異於世俗之好。則一也。君歸道山二載。丁卯冬日。哲嗣壻出是圖索題。

墟。子女婿也。爰作古詩一章。

人稟有生初。嗜好與之俱。好有雅俗分。所以別賢愚。古人不可作。今人其忽諸。矯矯清江裔。潛德比璠璣。一好佳山水。知章鏡湖居。二好醉染翰。顛旭善草書。三好習禪理。繡佛蘇公廬。先得飲中趣。後得飲中娛。遂願飲中老。以好息此軀。何處素封境。而能摒膏腴。若非盡解脫。塵滓來相濡。指月證前因。臨流嘆隙駒。茲雖渺音容。靈心在太虛。荷笠貌猶昨。行腳山僧如。述德有孤雛。展圖淚滿裾。

留贈詹丈石琴

詩壇之將文壇伯。衆中轉戰幟先植。邗上題襟識面初。口若懸河論精覈。制勝當年布陣雄。曾經束手觀從壁。延津館寂渺風流。著書閉戶歸真州。老屋三閒足高臥。秫田十畝資傾甌。竭來訪古款君門。何殊杜老浣花邨。恣游連襪探尋徧。東溪不見西溪見。林列青山隔大江。清風拂拂來船牕。只恐明朝鎖白雲。令人遙憶飛將軍。

題月香校書畫蘭便面

點點芳心墨露香。託根何地惜春光。知他纖手拈毫際。無限深情寄楚湘。

題貝壻簡香味書圖小影

嗜好由天性。詩書豈厭多。一編可陶養。千卷恣研摩。餘興搜金石。閒情託詠歌。酸鹹與世別。莫訝笑殊科。年少清癯貌。醜醜氣自華。蒼茫何獨立。秋水渺蒹葭。室擁古人籍。門來長者車。我今慚彥輔。喜爾玉無瑕。

題程綱堂所藏玉几山人墨梅冊

探梅鄧尉昨宵回，猶有清香入夢來。今展畫圖如舊識，月中疏影在莓苔。

題陸鐵簫臨謝仙臚漁鄉風趣圖

一簇漁舟笑且譚，夕陽照見醉顏酡。蒼蒼秋水蒹葭裏，也是人間安樂窩。憶到蓴鱸便覺遲，何如早理釣竿絲。探微識得箇中趣，添寫煙波無限思。

西湖柳枝詞王蘭泉師命賦

清波門外水連天，垂柳絲絲捲曉煙。雨織風梳才幾日，一齊排綠向湖邊。西泠橋畔划船回，南北高峯相對開。二十四番風信緊，飛花如雪渡湖來。綠楊低罩酒家壇，七里山塘入畫圖。莫怪吳儂惆悵煞，姑蘇不賦賦西湖。

戊辰仲夏遊江村園二首

園在儀徵，相傳是石濤營構，壁有石濤詩刻，爲真州最勝處。

真州水樹饒，平楚類幽谷。林藏一徑深，谿遠千尋綠。昔有習隱者，於此營小築。題詠遍名人，勝概久著錄。屢欲快攬觀，都爲事羈梏。詩人今挈遊，小艇棹來速。荷笠度短阡，入門見脩竹。夏仲方蘊暑，坐憩勝櫛沐。灌木積陰森，磊山具巖麓。物古自生愛，園古便不俗。問詢新主人，一歲僅信宿。羨煞老園丁，四時飽寒燠。倘能借讀書，奚啻居剡曲。招友必素心，脫略無拘束。壺沽卮釀醇，盤摘鄰畦菽。朝看隔江山，暮展插架軸。歎此結構好，須識良工心。經營在基始，意匠何鉤深。眼前見突兀，足底勞登臨。嶺勢高復低，巖界陽與陰。

其前聳危閣。倒影入碧潭。荇藻隱文魴。蘭茗集翠禽。其後隔短籬。仄徑通茅庵。佛燈暗長晝。風鐸生清音。山巔亭屹立。舉頭可捫參。檻外潭澄泓。曠懷宜鼓琴。軒敞華黍齋。雜坐喜盍簪。行廚盛肴饌。載酒恣酌斟。歲月苦苟延。虛牝拋黃金。茲日足歡樂。不負美園林。殘月照歸路。晴翠留衣襟。北窗支枕臥。猶夢升青岑。

美人石

名園稽舊址。突兀一峯存。在昔園池館。於今傍水村。飛從太華頂。墮作碧雲根。向著佳人號。應傳化婦魂。玲瓏支玉骨。斑駁積苔痕。竹樹爭鮮翠。煙霞慣吐吞。子然成獨秀。曠矣勢高騫。莫便傷膚寸。恐旋啓石言。來尋溪屈曲。坐至月黃昏。寂寞荒蓬徑。淒涼頽粉垣。定驚顛米拜。早有到公捫。碌碌沈埋久。還鑿入相門。

遊榆莊八首

廣陵多勝地。幽境在城南。結構隨高下。林亭自兩三。到鄉豈厭遠。策蹇好頻探。今日看花至。入門興已酣。數畝古遺種。翻塔次第開。翦旂表並蒂。圍幔護重臺。漫數王君譜。先傾楚尾杯。盃簪多脫略。屐齒亂莓苔。楓樹東方產。黃山松似蚪。載來知海舶。劇處想金鈞。月影潭千尺。濤聲風滿樓。池邊庭石畔。蒼豔各春秋。谿水灣環處。軒開四面牕。荷錢浮箇箇。燕剪掠雙雙。書史自文几。糟醕貯玉缸。借來能避暑。夜雨聽琤琮。短闌徙倚徧。夏日更遲遲。棋局留殘子。魚竿挂斷絲。綠陰梅已熟。疎影竹新移。領略閒中趣。當吟漫興詩。茅簷村舍近。日暮見炊煙。芒麥因風浪。雞牛飽飼眠。焙茶聞隔院。晒藥語晴天。偶上層樓望。山光落几前。賴有賢朋舊。嘉肴載酒過。銀鱗新脫網。浮蟻似澄波。更喜逢仙侶。還聽奏雅歌。茲遊真美具。時不負清和。

日長門不扃。地僻逕無塵。任客常來往。奚須問主人。古榆出老屋。清晝蔭居鄰。欲去徘徊久。斜陽照水濱。

題汪蘭塘愛日圖

笙詩逸小雅。束氏爲補亡。至今讀其詞。孝思生洋洋。汪倫海陽彥。至性莫與方。身雖遠服賈。甘旨時寄將。昨歲爲母壽。擔囊趨捧觴。徧乞名公言。芳徽藉播揚。來日正可樂。去日不可償。知年增喜懼。捫心乃迴遑。因此不匱思。寫圖付縹緗。嗟予久孤露。披覽神暗傷。執筆愧蕪陋。難繼南陔章。獻君高堂頌。俾爾壽而臧。

重脩六如居士墓祠落成賦詩四律和唐陶山先生韻

僊居豈合委鴛塵。小劫纔過景忽新。不是湘南來學者。誰知江左有詩人。後先何必分三界。僊佛從知萃一身。塢畔斜陽芳草綠。唐家園裏尙餘春。

何妨縱酒得狂名。此似浮雲薄太清。深抱隱憂無可解。藉澆塊壘尙難平。劉伶入世身常醉。阮籍窮途眼倍明。惆悵風流三百載。幾回晝裏識先生。

不合時宜數最奇。故交文祝兩心知。一堂共享生芻祀。千首終傳白雪詞。樹樹排桃環舊墓。盈盈綠水抱新祠。祇緣傲骨甘清福。未肯低頭作判司。

不鄰都氏讀書鏡。捨宅空王伴老僧。人說文章不經意。我看畫筆獨超乘。深閨幾處藏紈扇。古屋於今挂瘦藤。等是儒冠同感激。摩挲片石重韓陵。

# 紅蕙山房吟藁附錄

漁隱小圃記

王昶

楓橋之水從梁溪來。過橋分支。西南流別爲西塘。又有橋名江邨。其南則袁子又愷。漁隱小圃在焉。圃之先爲王岡齡居。名江邨山齋。岡齡師沈文愷公。工小詩。畫仿文待詔。往往招集勝流名士。作文字飲。具見所刻西塘唱酬集中。又愷之兄。岡齡女夫也。故是圃歸袁氏。其宗人簡齋大令。曾爲記。又愷拓而新之。入門貞節堂三楹。後爲竹柏樓。蓋節母韓太夫人撫孤居此。竹柏以況其節也。樓旁有洗硯池。池水滿碧。芙蓉花時。香滿庭戶。沿池徧植木芙蓉。有徑達夢草軒。傍柳陰。駕橫石。名柳沚。倚由倚而入。左爲繫舟。右爲水木清華榭。再進爲五硯樓。又愷嗜藏書。兼嗜硯。獲硯五。皆元明閒袁氏名人手澤。故以名樓。登樓遠山出沒。平疇如方罫。可供吟眺。樓東楓江草堂。南並草堂者。小山叢桂館。前有小阜突起。建吟暉亭於上。亭下接稻香廊。廊盡爲銀籐簾。西向最高者爲挹爽臺。草堂之後。栽牡丹芍藥。名錦繡谷。東則漢學居。又愷著書之地。又愷窮經。必本註疏也。再後爲紅蕙山房。鈕布衣非石。自洞庭山移紅蕙樹此。故名。凡十六景。而統謂之漁隱小圃。蓋視岡齡在日。固已勝矣。於是春秋佳日。吳中勝流名士。復命儔輩。來無虛日。而遠方賢士大夫。過吳者。拏舟造訪。填咽於江邨橋南北。樽酒飛騰。詩卷參互。更非岡齡所能逮矣。憶庚午歲。余從文愷公至此。迄今已五十年。西塘唱酬卷中。凡四十餘人。無一存者。獨予齒危髮禿。乃得乞身投



老盤踟躕。躅其閒。以續文愨諸公之後。且見夫亭榭之更新。圖書之美富。賓朋之戩盍。將與樂圃南園並美。旣以志感。又竊自幸也。故因又愨之請記。而敘其大略如此。

五硯樓記

錢大昕

袁子又愨。向居金昌亭畔。題其讀書之室曰三硯齋。予爲之題扁。三硯皆其先世所詒。一爲介隱先生物。一爲謝湖草堂硯。則尙之先生物。一爲列岫樓硯。則永之先生物也。丁巳歲。青浦王侍郎以所藏清容居士硯贈又愨。錢唐奚鐵生爲作歸硯圖。一時侈爲嘉話。未幾。又得谷虛先生廉吏石硯。併前所藏而五是。夏。又愨移歸楓橋舊居。甫卸裝。卽謀藏書之所。唯茲樓宜。乃奉先世手澤。及古今載籍。收藏惟謹。名其樓曰五硯。屬予記之。袁氏四世五公。著於東漢。晉南渡後。門望亞於王謝。吳中之袁。則自明嘉靖六俊以文行相砥礪。與三張四皇甫齊名。迄今三百年來。詩禮之傳。久而未替。又愨承其父兄之緒。益以通經敦行。孟晉匪懈。凡先世遺跡。流轉他姓者。輒重價購歸。弃之斯樓。生平篤好文史。聚書數萬卷。多宋元舊槧。及傳鈔祕本。暇日坐樓中。甲乙校讎。丹黃不去手。予嘗論世少藏書之家。藏矣。未必能讀。讀矣。未必能校。能讀且校矣。而或矜己妒彼。如許慈。胡潛。所爲亦未免通人譏議。獨又愨兼三美而無一病。予心重焉。其樓四面洞達。迥出埃壘。靈巖天平之紫翠。望之如可隨也。支硎法螺之鐘磬。招之若相答也。前俯澄碧。旁植花木。挹風土之清嘉。屏絲管之嘈雜。予蓋嘗徘徊徙倚焉。而不能去也。列岫久廢。今無能指其所在者。而硯尙存斯樓。主賓文酒唱酬之盛。不減於曩時。此吳中世族所難得者。予所以樂爲記也。

貞節堂記

孫星衍

吳之楓橋西塘有貞節堂。前開學翁鴻臚爲旌表節孝故奉直大夫袁君側室韓孺人所署名也。堂外闌闔而內爽塏。旁則引泉種樹。左爲竹柏樓。後爲五硯樓。皆節母獨居課子及子。又愷藏書讀書之地。堂三間。不崇不隘。無磨礪雕績之巧。不佞與又愷相識晚。恨不及升堂拜母也。又愷涕泣言母廿五而守節撫孤。越十五年而歿。方四十時。爲乾隆之四十六年。子婦等引時俗禮。欲爲母以生日舉壽觴。母舉古稱未亡人義。卻勿御。未幾母竟卒。又愷痛母益甚。徧乞當世賢士夫爲文。以顯母節行。彙一帙。命曰霜哺遺音。不佞時亦有母喪。聞其言。不自知其淚潄潄不止也。孝經稱揚名於後世。以顯父母。不謂今之名位。世之以科名官位達者。不過奉告身。張燕會以爲親歡。誇耀閭里。愚婦孺甚則忘身。以及其親。數典而忘其祖。若是者。一郡邑率有數人。其身榮。其後無聞焉。今節母卻壽觴。不欲自顯。卒得旌於朝。又愷不汲汲求仕進。以立身能文章名於世。又推其孝思。以及其祖。藏先世書硯之屬。以爲宗器。使天下之士。皆欲登其堂。觀其先澤。爲文以顯母之節行。若是賢子孫。海內千不得一焉。誠有合於孝經所云立身行道者。宜不以綠野。晝錦之堂之易斯堂也。

竹柏樓記

洪亮吉

入楓橋半里而近。有小谿通胥江。谿旁夾岸各數百家。岸西有老柏合抱。修篁成林者。爲袁氏竹柏樓。竹柏樓者。袁君廷禱之生母韓太孺人撫孤所居也。余交袁君遲。不及親見太孺人之行事。然每過吳門。士

大夫必稱袁君學行。其稱袁君學行也。又必本諸袁君之母。余已悚然異之。繼於友人處識袁君。又嘗一登袁君之堂。則所爲漢學居。五硯樓者。藏昔人書硯甚富。皆太孺人所留貽也。又於梁棟閒讀太孺人庭誥家範。輒諷誦不忍去。袁君復泣告予曰。太孺人之教廷禱也。凡廷禱一言一行之善。太孺人必色喜獎成之。獲交一端士聞人也亦然。凡與廷禱聞學相長者過從。太孺人必親爲治具。或有以緩急告者。必傾橐以助之。適力有不能。則款歔不怡者累日。太孺人歿後。廷禱承太孺人之志不改。家以此中落。嗚呼。太孺人可謂賢矣。余頃以罪謫戍伊犁。不半歲蒙恩赦歸。甫抵安西。卽允玉門令稽君承裕之請。爲張烈女作傳。今又得紀吾賢母行事。往返三萬里中。甫得傳一烈女。紀一賢母。然後知貞固之操。瑰奇之行。在世閒亦不能多得也。凡作竹柏樓詩者共若干人。而舊史氏洪亮吉爲之記。

紅蕙山房記

吳錫麒

夫美善人之室。揚君子之風者。旣比蘭崇。又方蕙潔。而況鄭家之草。書帶並抽。江令之花。彩豪同夢。尤足資葩竊之奇賞。藝林之雋談焉。則有紅蕙山房者。乃袁君壽階讀書之所也。樹籠四面。水得二分。窗納遠而留煙。樹凌虛而俯翠。入其室者。須讀五千卷。乞其牋者。輒得九萬枚。懷德惟馨。締歡彌古。所栽紅蕙花一本。溯清芬於前哲。通夙契於良朋。讀廿五之騷。魂招楚客。吟第三之篋。帆下洞庭。驪長枝而帶抽。轉緒風而光入。密葉隱其翠。諶深叢粲其紅。笑固知異色而同此素心。出山而不渝遠志者也。於是命速嘯侶。比調合聲。與香共紉。含氣競吐。纈丹霞於秋佩。鍊朱露於春房。刻燭催成。停觴賦罷。玉山頽而酒容發。銅

繁膩而蠟淚堆。申旦忘疲。高談亦綺。足以振餘芳於十步之內。耀孤穎於百晦之間。此花與人並傳不沫矣。僕草木之志。讀而不詳。蓬蒿之居。美將安樹。懼看朱而成碧。恐混艾而爲荃。乃蒙屢寄瑤箋。兼呈麗製。屬以一言記之。鳴玉鸞之啾啾。是誠作者。高余冠之岌岌。毋乃惡然。藉代疏麻。聊陳短引。他日得爲羽之翁。或亦善爲蘭之馮乎。是所幸已。

贈袁子壽階移居西塘序

謝振定

余過大江南。獲交二孝子焉。皆節母之後。能事賢友仁。以顯其親者。一爲吳縣袁子壽階。一爲蕭山汪子龍莊。龍莊少孤。二母鞠之有成。所居建雙節堂。遍求天下鉅公名士之詩若文。至五百餘家。刊傳之行於世。一時翕然稱其孝。及壽階刊有霜哺遺音。出其卷帙之富不逮汪。而詞旨精美。或過之。霜哺遺音者。壽階爲其母韓太孺人苦節。乞言之所哀而輯也。余與壽階遊。每言及太孺人。有悽然之色。聞出其先世手蹟。自有明來。如謝湖胥臺。諸公之簡牘。及當時名流記序。志銘。投贈之篇什。積成若干冊。彪彪麟麟。倅於宗器。歷數百年。弗敢遺。且日有增焉。此又汪氏之所未逮者。余初過吳閫。壽階以竹柏樓記見屬。時方有西湖之行。未有以應。比歸而壽階已移居楓橋西塘之舊廬。乃與二三友人鼓棹而訪之。問所謂竹柏樓者。無恙也。登其堂。有鬱鬱蔥蔥之氣。花木水石。各備其勝。遂相與談宴。竟日於五硯樓下。余惟古之人。念手澤口澤之遺。思其居處。思其笑語。終其身不忘其親。用茲日慎一日。克弗隕其令名。方太孺人之在斯廬也。孤鐙熒熒。形影相弔。足不下竹柏樓者。閱十有五年。卒乃殉夫。以遂其志。匪第手口之澤而已也。則

壽階之眷眷於此也。固宜。且太孺人飲冰茹檠。惟冀其子之成立。以報所天耳。壽階上承世德。績學有聲。乃能得賢士大夫之贈言。以表其節。以光於奕葉。此太孺人之志也。非太孺人無以成壽階之賢。非壽階無以彰太孺人之德。誦昔人春暉寸草之詩。其爲報也。有令人油然而感者矣。汪子以進士起家爲刺史。有治聲。其子又舉於鄉。其進隆隆焉。而未有已。論者以爲節孝之報。由是推之。則袁氏之積厚流光。庶幾遲之久而愈大也。是可以壽階之賢卜之也。壽階有移居詩。和者甚衆。余獨感其不匱之思。竊附於張老頌禱之義。爲之序而贈之。至太孺人懿行之全。諸前輩具詳之。不復贅。

題壽階袁君遺像并手書尺牘冊後

顧承

余聞袁先生名久矣。或曰先生內行純篤。事寡母以孝聞者也。或曰先生爲人性通。樂人善而周人急者也。或又曰先生頗好古。富藏書者也。然余未及見先生。先生卒。乃識先生之女夫貝君簡香。出此冊。并先生行略示余。冊爲先生手牘。凡十一通。冊首有先生遺像。余乃益知其詳。嗚呼。先生真古之人歟。先生生六歲而孤。生母韓孺人守節。不下樓者十五年。先生遍乞當代名人爲詩文以表顯之。大吏爲請於朝。得旌其節。孺人歿。先生又繪竹柏樓圖。以寄終身之慕。家故饒於費。先生好行其德。遂至中落。性嗜書。聞有善本必購。與周明經錫瓚。顧明經之達。爲藏書三友。袁故吳中著姓。自六俊後。代有聞人。而世系闕略。先生網羅舊聞。爲之譜牒。遺文墜簡。積數巨冊。復得遺硯五。其一爲清容居士硯。因以五硯名其樓。歲終。陳其硯。設酒饌祭之。晚年生計益絀。去而遠遊。名公巨卿爭延致之。後客武陵。疾作。歸而遂卒。年僅四十有

六。嗚呼。先生真古之人歟。簡香珍重是冊。有以夫。爰書其後而歸之。

又

孫星衍

五。硯樓空已再遷。百城書在付誰傳。婿鄉留得中郎影。相對冰清挾一編。

又

張問陶

遺墨遺容落壻鄉。分明逸少在東牀。若非嗜古有同癖。身後誰能什襲藏。

又

吳翌鳳

河山今已邈。才士迺無年。名並清容著。文因李漢傳。紅蘭摧宿莽。翠墨剩殘牋。回憶追游日。披圖益泫然。

又

陳希濂

六。俊聲華莫與儔。先生繼起足千秋。娛親爪比懷股憚。插架書寧讓鄴侯。緬德共嗟人已往。披圖猶幸影空留。百年難得乘龍客。珍重能將手澤收。

又

江沅

諸世閒相。無有堅固。詩書之味。與心常住。重物輕己。聚散怒然。詩書之癖。與性爲緣。得之失之。去則去人。一編在手。心性皆春。海內君子。多君孝德。文行之醇。光於簡畢。長物俱去。高名已傳。遺像清古。月到遙天。世人多術。君獨忘機。歿世之戚。知我者希。萬卷在室。其中無有。與君較之。孰勝孰負。墨香瀟灑。直到古人。其言藹如。動以天真。君與貝君。冰清玉潤。持此天真。回向佛乘。常住無住。真空不

空戀彼伎求。景此清風。

又

趙光照

夙昔仰高躅。旋驚已古人。紅蘭萎舊圃。綠樹暗芳津。萬卷胸藏富。一編手自親。平生遺翰在。猶覩墨痕新。

袁君壽階像贊

丁子復

汝南六俊。四皇甫匹。越三百年。得君而七。萬卷手披。三物躬飭。用敦薄夫。惠風遙集。

題袁君壽階味書圖小像

顧廣圻

自經死矣。山樞痛掃地。曾無長物餘。不及生前圖像好。手中猶保一編書。

